



七十二峰足徵集卷十三

武峰吳定璋友篁菟錄

震澤王金增師李編訂

嚴經

經字道卿號芥舟東山人弘治丙辰進士南京刑部郎中正德中出為河南彰德府知府有巨璫乘傳至不為加禮遂短之於劉瑾乃解組歸栖遲山水與王文恪公施東岡高士作文字之飲絕口不談時事

舉目

舉目偶有適庭開錦葵花憬然知夏初鄰園正鋤  
瓜雨荒不得種隴麥已生芽撫時滋歎息天人寃  
疇差

秋夜直宿西署寫懷

備員散地慊迂情穩卧官齋夢不驚自分愚忠乖  
世道肯將智慧擅時名謏材媿乏春秋筆清議匪  
從月旦評伯樂不逢行健老乾坤落落眼誰明

西渡浮橋成

通津誰擅濟川功聯絡方舟指顧中鎖鑰洪流平  
急浪驅馳坦道過長虹古人不作思良法王政于  
斯用不窮從此載途歌利涉豈於溱洧乘輿同

王少溪貽書見訊賦此代柬

壁蘿團翠覆殘衾冷淡吾門自古今月落未回孺  
子夢歲深宛見幼安心喜無翦茸供閒掃小破沈  
寘託醉吟巷僻徑荒誰過問故人還念病愁侵

約東岡登高

久矣不辨登山屐擬結籃輿上莫釐五十看看成

老大不妨歸路醉如泥

題畫贈素一

琴尊成約帶星回  
遶屐松花點逕苔  
矮屋莫嫌無  
客到有人憑几醉書來

嚴果

果字毅之芥舟之孫  
天賦高懷不求聞達  
自號天隱子山陰王季重序其稿曰  
自弇州挾歷下鞭馭  
盱衡海內後先才子俱上贄貢而所不能致者會稽徐文長臨川湯若士其鄉則嚴毅之先生云所

著有天隱子稿十七卷

憶普照菴因寄

孤菴落水墟風雨坐岑寂往來簑笠人所見  
沮與  
溺野曠淒暮烟天荒慘寒色風荻鳴蕭蕭飛鴻起  
沙磧觸緒興憂端循躬感徂迹予昔何來斯圖南  
鍛雲翮鼎餗求未能俛首事僂石蹉跎三十年青  
陽已垂白老思安故邱異壤非吾適何當解所嬰

逍遙暢胸臆

秋夜長

七十二峯

東山合編

卷十三

悲莫悲子秋夜長感祖謝子悲淒涼朱明去子歸  
白藏連石下兮收餘光移蓮秉炬歸洞房合歡繡  
被芙蓉香參回斗轉夜未央徘徊延佇如相望流  
螢飛來繞画梁似憐幽寂為徜徉關山月冷鴻雁  
翔懷所私兮天一方風波渺渺雲茫茫魂欲去子  
愁無將燕山八月早凝霜無人為寄寒衣裳憂深  
思切終斷腸悲莫悲兮秋夜長

蓮塘歌

若耶荷花不可見每懷六月西湖遊西湖道遠未

能即風光夢寐思悠悠揭來步武銀塘曲滋喜翻  
多錦雲簇千百紅粧競水嬉溫泉勅賜宮人浴艷  
質華姿藹靚妝羅襦繡帶儼成行低徊映水千般  
態歎薄流風百和香天孫織就機中綺一幅平鋪  
鏡湖水天然生意不可為剪綵鎔金徒自靡惟惜  
開當古道倘祇堪行路駐游韉寒芳騷客今何在  
誰復臨流酌一觴

敷素堂行

吾聞太素之道起玄漠黃虞以來猶渾噩天靈自

然名希夷至道無文厭雕琢末流既勝絺繡繁鮮  
靡瑰麗同趨犇朱絃鏤篋炫竒器丹楹刻桷傾華  
軒芬蓋雜還啟高會擬金戛玉聲喧喧縹清未滑  
易蘓綠駝峯不足加熊蹯風會于斯日靡靡太樸  
之精恣淪委乃惟天民敦素心砥柱中流返其始  
茨不剪椽不斷庭不除墁不堊太羹不和粢不鑿  
菁菁蚩蚩屏外營斯意冥冥契寥廓堂名曰敦素  
堂中何所有高牕懸素琴可以感天地通鬼神鏗  
然發越太古音堂中何所有汗尊列玄酒可以怡

性情悅賓友陶然茗芋亡何有白雲為籓籬明月  
代燈燭閒花日吐芬幽禽時度曲逝者如斯與化  
徂沁水洋洋意自足南陽有廬曠千古孔明晏坐  
歌梁甫環堵曾聞西蜀亭子雲寂寞草玄經豈無  
璿臺飾珠玉豈無甲帳圖仙靈榮光一逝盡墟土  
謝敷炯炯存微星高人以斯遠塵鞅幽居卜築溪  
之津讀書談理慕昭曠韜光戢景懷真純清風隱  
几北牕下嗒然自謂義皇人

答陸延州秋日過訪

蘋花媚晚姿白露下淒其有客從西渡看予理釣  
絲徑荒滋蔓草門掩隔疎籬興盡飄然去何如剡  
曲時

送行

火雲猶未斂之子事遐征蟬柳夕陽淡魚梁野水  
平風烟輕倜儻霜露易淒清明月思千里同懸此  
夜情

搗練

月色夜溶溶千門搗練同安排思寄遠夫壻在遼

東霜霰催寒緊蛩螢弔影空斑斑衣上淚盡落杵  
聲中

寄友

歲籥頻相薦風期宵莫攀鶯聲虛故苑雁素渺重  
關碧樹雲中屋蒼烟水上山相思千里外何日慰  
刀環

美人教梳頭

粧罷意爭妍憐君髮未鬢鳳梳膏共沐鸞鏡影同  
懸卷蠶分鈎曲蹲螺笑髻圓願持巾櫛意永結白

頭緣

過舊館

舊館棲魂處  
匡牀赤板扉  
乍疑一夢醒  
已是廿年  
餘范帳收殘墨  
韓檠慘落輝  
風沙易流轉  
鴻跡竟何依

春日宮詞

綠烟芳樹掛晴絲  
一鳥花間睡起遲  
別院何來歌管沸  
長門不省畫圖知  
傷無蕙草絨離思  
怪有梨花約素肌  
一自上林游幸後  
玉輪消息渺無期

菴中

裋褐蕭蕭寄水村  
斜曛落葉滿荒園  
湖光隱約林扉靜  
野色蒼茫草樹昏  
徒爾商歌悲永夜  
不堪衰颯望中原  
誰云老驥非千里  
尚想金羈玉勒恩

秋興

颯沓寒空一葉聲  
斷猿巫峽共淒清  
木天無夢猶西笑  
銅柱何人想北征  
幾樹昏鴉搔首立  
誰家羌笛喚愁生  
信來得喪非由我  
咄咄書空總未成

秋日寄殷仲



曛樹蒼茫萬里舟江天遙望仲堪樓書空咄咄憐  
同病擊筑蕭蕭感暮秋五夜獨醒魂自弔廿年如  
夢水空流風烟不接西昌里鴻雁無從歲已遒

庚戌紀事

元戎功業海西頭城下王孫貴未俟寶劍光輝清  
塞月錦裘凋敝禁垣秋中興不數周宣烈雲夢無  
煩漢主游千古英雄還濩落獨憐蠅點不勝愁  
聖主山河磐石安清郊戎馬不曾看百年已忘苞  
桑計萬竈誰登上將壇鳴鏑故應瞻冒頓尺繩空

欲繫呼韓功名要向燕雲外隴水淙淙濯肺肝  
天高雲黑洞秋暉悵望重玄事總違相國門前金  
作埒真人壇上玉為衣繞城山色風烟起向海河  
流日夜歸携手祇須尋樂土草萊終卧北巖薇  
風勁雲高肅帝居神君來降上林祠泰山欲望東  
封仗渭時曾瞻北狩儀玄極羽流持寶籙侍臣門  
下譔青詞文成富貴殊堪羨怪底身名到鳳池  
百二山川錦繡遮金墉龍虎奠中華秋高河朔驅  
雲騎日落城邊起暮笳退散未酬文士策論功欲

降將官麻朝廷有道方隆盛委澤么麼莫漫加  
金章紫綬漢廷身暴骨橫尸車下塵賞罰令嚴真  
聖主死生名重竟何人樗材不伐休論壽蒲質先  
零亦自春回首明時無限意江山千里重傷神  
大將旌旗出塞遙指揮如意坐輕輅士生菜色親  
兜鎧虜向花原射隼雕萬竈供儲非一日八方征  
賦約千條休為身計叨榮祿天上恩光日月昭  
彩鳳泥書出漢城九遷曾貴上台星綱常不似雲  
烟變今古真同泰華停坐論才名非易選象恭流

極見常刑蒼生不為歌黃鳥亦使寒原鬼燄青

寄蔡林屋

一派笙歌出畫樓風流彷彿在揚州朱簾捲雨來  
三鳳碧簾眠雲傲五侯杯玉釀酣山色晚扇羅香  
拂桂花秋題詩報道張公子願惠殘書療客愁

送劉生

劉生跌宕不偶世俠氣上與青雲摩乘酣索酒新  
豐市擊劍行追沛上歌自言老人素書貴不羨季  
子黃金多班馬一鳴千里道愛而不見傷如何

菊花

不競春草榮相將歲華晚所以君子心孤芳自偃  
寒

梅花

臨風粲粲玉為姿春到人間蝶未知記得西湖泊  
舟夜月明風淺見橫枝

嚴倫

倫字天彛

過瞿稼軒先生東學廢園

河山哀莫挽敢惜一園荒寒雨餘衰草春風剩白  
楊蜀鶻誰為拜遼鶴幾時翔淚落成墟處忠貞永  
不忘

午日胥江觀競渡

競渡胥江值此辰一為忠孝兩馳神嗟哉澤畔行  
吟日窮矣蘆中乞渡身魚腹英靈還獨醒鴟夷精  
爽迄如新投詩直達蛟龍窟亦弔吳臣亦楚臣

嚴宗顯

宗顯字用晦嘗集艷體詩二卷葛震甫序之

雨霽過鄭世貞晉之讀書處喜張仲美徐子  
能在座

出門若無意幽事偶然成得句泉俱冷開心竹共  
清聚當今日勝山喜昨宵晴小閣空纖慮薰風一  
榻生

翠峰寺尋陳眉公同葛震甫

松風泠泠滿竹筇相期古寺追高蹤禪扉半閉佛  
不語幽人一笑花間逢

嚴茂初

茂初字元發號遵崖與弟茂慎攀鳳同為諸生蜚  
聲黌序遵崖尤才思敏捷一日可得數義詩賦四  
六信手而成有七步八义之目闡中卷先後凡三  
四薦終不售明經以老有傳硯齋集一卷

輓節烈符氏

節烈侔忠孝何人副此名晚蓮應獨秀秋月與雙

清乙卯七月廿一日殉節

誓決同衾穴情堅一死生旌閭他

日事傳語已心傾

萬古綱常任深閨一力肩軀捐設奠後心許蓋棺

前夫將瞑目許以身殉溪曲聲同咽樓清節竝懸  
曲溪上清曠閣秋官舊門第冰雪有因緣  
為氏殉節處

輓朱鶴書

世俗交遊古道微九原不作我誰歸披星並轡情  
 猶昨坐雨論文事已非琴掛蕭齋渾寂寞影懸總  
 帳半依稀茫茫碧落渾難問鶴語何年聽令威

嚴大本

大本字方立郡諸生

南村草堂讌集呈節庵七哥

南村高會繼西園四美逢時為二難繞座芝蘭香  
 笑語翻池花露濕闌干雪桃分得千年實白墮移  
 來十日歡獨愧追隨無彩筆看君赤幟樹吟壇

初冬過依綠園

小雪才過木未凋池亭和煖足消搖芙蓉蜀國新  
 粧臉楊柳香山舊舞腰種菜童歸黃葉路窺魚鳥  
 坐赤欄橋臨風拄頰添清興銷得新笏綠一瓢

遊石公山登明秀閣

插天怪石不容攀小憇山亭看斷山日暮更登王

氏閣愛他明秀欲忘還

宿梅園金叟家

野老殷勤留客宿所居戶外盡梅花他年若作探  
花使記取梅園第一家

嚴始

始字開一自號六如子所居北葉湖上有果園背  
山面湖中有巨石如屏屹立六如題曰嘯巖每呼  
同志觴咏其間樵夫野老經行其下聞半山有鸞  
鳳聲知六如醉吟時也遺詩二卷任允功梓以行

世

觀海

遊目失四表萬里何溟濛豈知一天地淪沒波濤  
中上有金銀臺下有蛟龍宮奔騰走白日滂溥號  
神風此內靈萬族其外無餘通苟能出微茫長嘯  
凌高空

寺夜懷葛震甫先生

落葉積古寺入暮山蒼黃月光凍不流前林白如  
霜脉脉馳遠懷離離感鳴蜩繩牀此夜安夢隔秋

雲長

西隱禪房偶集

羣綠函僧寮憇此醒塵寐白賞天亦閒清言佛能  
對始悟沉冥中斯心了不礙

韓蘄王碑

穹碑立高巖樵牧訝其位蘚蝕留烟霜松垂蔭  
巖英雄不死心銓次頗明備空山闕雷雨白日泣  
魑魅回首斜陽中陰風閃幽翠

孤松篇

卓然屹立深盤根挺羣蔽物勢孔尊枝葉不漏日  
月影苔蘚盡染風霜痕從知千尺是爾性高欲摩  
天自為命時乎瑟爾發孤音遠取秋泉同一韻空  
山有士能長貧晨看夕倚如比鄰自言此外無與  
親青蒼不改同其真

葉梅友折得古梅寄雲間金卿佐之以詩

竒幻驚人眼潛知不易尋恒持冰雪理遙慰歲寒  
心泐上香偏久山中白漸深君能修護好淨几即

高林

七十二峯

東山

卷十三

山夜聽秋蟲

坐山忘夜永土屋侯蟲鳴林末息群響草根時幾  
聲訴風多斷續泣露獨淒清旅次窮愁客應知恨  
五更

巋留石上看雪同陸仲飛

絕巘通危路巖風振遠林光明千里地太古兩人  
心在水不知白因山方見深碧烟微動處高卧客  
難尋

集西石山房

入門秋忽暝竹色結寒陰綠走烟開樹香飛雨出  
林客因脩淨業僧語解吳音次第聞幽磬南朝寺  
果深

春日登樓

寒暖平分近麥秋東風扶我上層樓自教着眼于  
高處不媿題詩在上頭叢綠樹從簷外短好青山  
向壁間浮晴空欲攝心魂去直繞天涯何處收

八月十四夕柏子街步月分得六魚

晚當山寺月來初柏子垂陰秋不疎衆響在林時



颯颯孤光隨我自徐徐白凝樹杪烟霜似影落街  
心荇藻如薄醉微吟皆靜賞明宵莫羨一分餘

四皓祠

山風落落古祠荒野鳥呼人正夕陽今又避秦悲  
一調昔曾安漢耿重光雲堂引薦寒芳芷商嶺遺  
碑吐碧霜隱現姓名傳震澤采薇何似采芝香

高峰寺度歲

暫離塵網叩松關終歲勞勞鬢已斑萬事過時俱  
是業一年今日始知閒爐存柏子消煙篆瓶插梅

花照雪顏佛座一燈相共守春風先覺到空山

懷炤公

欲叩荆扉意自慵秋雲貼地白重重山南松檜望  
不見夜靜月明聞打鐘

自靈巖至一雲塢

十里松篁五里茶柿黃榆赤見人家家家採石爲  
生計不惜芙蓉幾瓣花

春日梅友還山

知君久客鄒湖涯昨日扁舟始返家問我春來幾

場醉癡魂一月伴梅花

嚴允弘

允弘字任夫號邃涵少喪母遭掇蜂斃犬之讒瀕于死者數四其大父憐之令出居於外給以薄田二十畝為饘粥膏火資得屏跡讀書補邑弟子員食餼有年芟田許氏延為師許固富而好禮昆仲四五輩分宅而居皆延吳下名宿講貫為制舉之文邃涵相與切磋深造有得棘闈卷凡三薦萬曆甲午擬元數奇不售因盡焚其稿縱游平康狂歌

痛飲或寄居蕭寺討論內典以消磨壯志著有花境寓言雲居澹言皆自為序所遺詩古文辭數百篇門生鄭國隆序而梓之

包山鳴泉閣贈懷上人同俞仲茅葛茂甫震甫分得鳴字

化城流慧水峻閣映雕甍隱隱峰頭過泠泠竹裡行曹溪分脉絡靈鷲達澄泓益助空林寂能忘別澗鳴潮音真可並地籟覺茲呈蒼翠湍中落雲烟溜處迎燈懸垂倒影磬斷續幽聲得雨源逾急如雷聲

賸轟噴空山月動漱石夏寒生  
潛卧龍時醒飯依鳥不驚  
曇花資沫潤貝葉藉濡榮  
出定機同活談玄氣共清端  
倪探起伏元化證虛盈  
寄跡渾忘歲于泉永結盟

同馮太史開之遊翠峰次韻

靄松青夾道法雨淨諸天  
恪共雲心客來叅雪竇  
禪禽聲春協律花色晝生烟  
掬得名泉飲形輕覺欲仙

有贈和馮太史韻

學得霓裳調尤工五十絃  
纖腰元是柳軟步自生  
蓮弱態樽前怯新愁拍上傳  
曲終無限意寧獨主人憐

山居

花落知春去林深境自幽  
笋根穿戶內蟻路過墻  
頭藥炷時親理名山好卧遊  
暝來雲滿地雲上漫夷猶

新製看山服飄飄體骨便  
出門携白拂穿徑破青  
烟瓣落花流澗梢長竹礙天  
林間逢木客相話一

欣然

病卧筠公山房

一入青蓮宇相游謝五陵澗  
蹊花裏覓巖閣靄邊  
憑晨粥分僧鉢宵吟伴佛燈  
維摩容作弟却愧不能勝

小有天呈略上人

一閣如拳大因名小有天  
檐低雲裏嶂檻度樹頭  
泉主靜儒門觀無言吾道禪  
自來天上任分得誌  
公玄

法海山房寄許章甫

兩月違玄度幽蹤寄僻林  
薜門山靄戀苔逕雨蟲  
吟著作通禪理呬語雜梵音  
敢云時命謬未減昔  
年心

法海山房有懷秀甫實甫伯仲

為有耽幽僻居從老衲分  
窓寒飛綠雪几淨戀香  
雲物外叅空教間邊繹貝文  
獨嫌違二妙經月不相聞

同朱太史文寧宿包山寺

自是逃禪侶相過  
佛院深月窺  
千臘火花覆  
半堦陰說盡無生話  
惟餘不垢心  
焚香趺坐久  
蓮漏響清音

山房卧起

如年祇苑晝境遠  
斷塵譁竹榻  
慈雲出松關  
慧日斜砌翻書帶  
草池動水梭  
花展卷憑芸  
几奚奴適理茶

過錦上人山房讀書

徑轉藏方丈  
幽深隔世紛  
竹搖牆上月  
花落砌邊

雲爐篆香侵墨經  
函借貯文端  
居無罍凝禪意  
自予分

文社集紫羅閣

大業相期十載功  
益資麗澤共磨礱  
過橋柳蔭曲溪碧  
隔岸鶯啼仙杏紅  
銀燭歌殘聲是雪  
青萍看處鏗生風  
醉來亦信逢明盛  
肯與途旁苦李同

承大鴻臚覺齋徐公見寄房師龍抑所先生  
薦余卷為易房之首副典試寅所周公有定  
元之目而正典試與龍先生不合竟置不收

感而有作

挾策觀光氣軼倫  
可堪蕉鹿事非真  
敢云白璧空投楚  
却笑烏裘已敝秦  
肯以遭迴天路意  
漫將搖落管城春  
樂行元是憂違者  
更待如師獻納臣

集施正甫園居限韻

荳花垂樹幕疎籬  
掩日團陰簷際移  
過雨蟬聯聲協調  
出峰雲影態增竒  
世途險仄何須問  
心境恬愉我自知  
漱石枕流堪閱歲  
功名不效五羊皮

書寄青樓

策馬平康別豔嬌  
離愁酒滿豈能消  
書憑青鳥雲端附  
路入巫峰夢裏遙  
深院花枝春黯黯  
一池月色夜寥寥  
可期桂子秋香候  
得再登樓協鳳簫

憶白下陳姬

樽酒河梁楊柳邊  
馬頭長劍欲橫天  
雨花掛日紅翻袖  
桃葉浮烟翠潤鈿  
尺素托魚雖不斷  
高樓乘鳳是何年  
文園博得風流恨  
綠綺而今懶上絃

秋夜訪徐姬於朱公子席上口占為贈

桂花叢裏月爭光  
乘月遙尋窈窕粧  
自喜半生能

買笑豈辭一顧為憐香清樽倒影涵金鳳明燭生  
花炫錦裳刺史看來腸欲斷多情誰不說徐娘

夏日同源公過卧佛寺遇梵公

一峰翠嶺枕祇林白苧翩翩物外尋溪澗春雲秋  
易到松楸夾道晝常陰逢僧乍識渾如舊證佛無  
言却會心徑轉修篁臨碧雪欲資慧水滌塵襟

寺前

有碧雪泉  
色味俱佳

懷洞然上人 上人善醫工画

昔携書劍錦鳩東澹月丰神喜見公心斷去來超

劫外相無人我礙空中楊枝妙法傳天竺烟渚新  
圖壑惠崇百尺竿頭猶可進不知何以繼前功

送王百穀進香茅山

蒼翠輕沾兩袖芬遙從靈闕禮茅君歸來試探奚  
囊草盡是華陽洞口雲

春日南庵即事

讀倦拋書日欲曛  
麴君桐友暫為羣  
敲門賈島來相訪  
驚散花間一片雲

月夜聞琴

誰抱桐君響碧蘿花城月朗白雲和聽來亦有高深意不似雍門感慨多

嚴兆名

先生字賓聞世居寒山下先君子受業師也持躬端正而氣質溫醇下帷攻苦無間寒暑康熙間有入貲爲博士弟子貲之例督學使者試士每縣額取四名而以貲生足其額吳中應童子試者縣約一千餘人而府取止限七十名其倖而得名而藉以牟利者售之價可三十金當是時先生無

府名徬徨于館中夜不能寐先王父知之謂先生曰考試固無常第先生意中有操必得于四名中者吾當代爲之謀入試遂補吳庠生體素羸弱竟以攻苦致疾齋志以沒

元宵靜坐

戶外燈月輝夜遊良有以角觝戲魚龍胡為不樂只開卷娛我心九經廿一史得意在忘言蝨魚蝕故紙俛仰文室間鳶飛魚躍水

嚴自成



自成字爾弼西山東灣人

陸伯相園亭

幽人抱玄覽結宇曠風塵道在元非病書多尚未  
貧月來池不夜花發圃長春試問愚公谷何如鄭  
子真

木竇夜泊

夙抱山棲癖茲憐水宿多雖嫌村市語亦愛榜人  
歌驟雨還明月微風復細波客愁難覓醉無奈夜  
涼何

陳眉公先生偕戴悟軒文學邱增城包省弦  
兩孝廉過訪

久識才名並席珍葦門何意枉車輪喜於山水能  
諧好愧乏文章可動人座上揮毫為橘賦燈前醺  
酒酌花神不知鴻漸丹霄後還憶山中舊隱淪

秋日送孝基遊虞山

為訪名山賦遠行好從絕頂振衣輕江流北望元  
如壑海勢東來欲撼城百世並崇文學祀千秋猶  
式讓王名知君陟屺思親處遙見重湖素練明

嚴王簡

簡字德偉號魯狂武山人

燕平雜詠

山城二月雪融勻微雨朝過浥細塵拂面始知風  
力軟舉眸漸覺柳容新久拋棋局銷爭劫兀坐佳  
牀學避人欲向東皇問消息九門今有幾分春  
城頭翠色藹龍從天壽屏開接太空戀岫嬾雲由  
去任受風鷓燕任西東暖乎楊柳隨心綠春透桃  
花著意紅故里湖山無限思不堪回首夕陽中

麥秋雨過曉寒輕榻卷披裘衆慮清學到會心皆  
實理論云齊物止虛名微吟細玩詩家画絕飲何  
興酒國兵昨夜故園曾入夢竹梅垂柳自菁菁  
天空無際似波澄抱膝長吟看月升徑草久荒常  
作客顛毛今秃儼成僧慈烏棲穩一林靜布穀聲  
悲百感生熟讀離騷忘夜永呼童幾度剔殘燈  
綠陰多處晚風清科跣閒行聽鳥鳴天地悠然何  
物我身名飄忽等蓬萍世間有譽毀先伏心上無  
憂樂自生徒倚斜陽青嶂隔比鄰榴樹燦紅英

贈秦友蘓

江上風流舊著聲  
蛩然杖履過山城  
喜親珠玉常懸榻  
仲舉當年豈好名

嚴灘

灘字孝思嘗于舊京獲小玉章曰灘字子磯故又號焉書學章草詩宗葛震甫

燈下看菊

挈酒先尋菊持螯對素秋  
影燈過一丈臨畫得瓊  
鈎地僻人棲托波澄月拍浮  
欲賡張翰句長揖謝

風流

題葉君郁梅屏

山家梅樹藝成林何事君園幻作屏  
口角未聯詩五字枝頭已覺酒傾瓶  
平開雪嶺冰為障薄染香垣玉作城  
只恐美人乘月去故將春色鎖銀屏

嚴樞

樞字緯仲縣諸生

立秋日聞蟬

炎颶飄樹響忽覺候遷流孤調人殊聽一聲山已  
 秋鳴長如有寄飲淡更無求今日商音始感時因  
 爾愁

七十二峰足徵集四六文卷十三

武峰吳定璋友篁菟錄

寒山葉時榮植園編訂

謝建康到任表

石林

分東道之封圻再臨江國守北門之管鑰密護宸  
 居任非所堪辭不獲命臣某伏念臣去違軒陛俯  
 仰十年退伏邱園棲遲一壑念多壘尚艱則懷捐  
 軀盡瘁之義思大恩未報則有畢命靡他之言敢  
 擇所安自求遠屏喟年齡之浸晚迫疾恙之交攻

惟聖主曲亮此心故愚臣得安其分豈期人乏復  
誤詔除力殫懇款之誠莫動高明之聽勉交印綬  
實愧吏民茲蓋伏遇云云惠顧臣鄰憂勤土宇撫  
萬邦巡侯甸何止臨踐土之官會諸侯選車徒是  
將復東都之業責其未効付以舊邦斗運天旋已  
振荆吳之勝氣風驅電掃行消河岱之妖氛但臣  
陳力不能強顏何補欽承威旨暫假歲時疆場無  
虞倘苟已於譴責冕旒甚邇尚終異於慈憐

擬唐張九齡上千秋金鑑錄表

開元二十四年

施槃宗銘

學古有獲規形假借以自修成憲無愆亮采綢繆  
於往鑒祝頌所寓恭敬是將嘉與廷闕之臣同慶  
華封之祝粵稽高宗思學心本在於求賢載聞姬  
發受書理惟先於勝怠降觀於後漸失其初貴異  
物於遠方或玩物而喪志接千歲之統猶及見於  
昇平奉萬年之觴亦得裨於拜獻驗廢以興躬鉛  
槩之實錄因今知古豈粉飾之虛文祖宗垂訓有  
以人爲鑒之言臣子進忠取制器尚象之意覃思

往昔之是非指諸掌上祖述前王之隆替盡在目  
前寬能用察不知形過則照窮往以知來貴乎明  
生於安止竭陳一得仰助萬機鼓鑄堯舜之模陶  
冶商周之範茲蓋伏遇  
瑞應河清德符  
鳳至麾義旗於碩果之餘奠九鼎於候梅之日不  
蔽於私且以明見萬里益磨以義固將洞察纖毫  
諸子之言善可法而惡可戒六經之道亂有本而  
治有源以之反觀莫不瞭然即云視遠亦維晰矣  
緝熙維助庶表見恭順之心昧爽所需蓋終存典

型之義臣九齡叨居輔地數年於茲待罪禁林一  
事無補喻取正冠在臣子各有所獻事君以禮此  
臣之自有微忱時賜披閱永惟不顯之昭昭宜鑒  
于殷亦見清躬之穆穆禱未罄於三陛下或亦不  
重乎此亡復有其二魏徵其復起於今伏願天命  
常新袞職無闕嚮用五福如大川之方增錫厥萬  
民似方昇之未已

擬宋司馬光進三劄表

嘉祐六年

吳

惠

孟仁

詢於芻蕘式備萬幾之助咨爾岳牧敢陳一得之

餘圖治奚先勵精爲貴臣時則易明察其難道有  
貴於下行情不難於上達竊以朝廷設旌善之方  
實天子冀弼違之志故敷謨夏禹股肱維康陳說  
商宗聰明克憲太平未兆實由主聖臣愚清問方  
勤每欲朝嬰夕側未有不以臣罪爲當誅反以臣  
言爲可采如今日者也茲蓋伏遇三朝下命式  
九圍道成一統雖內安不忘外懼而慎始亦以圖  
終銳意用人採擇不遺於葑菲留心納諫求言下  
及於草茅如此深心豈無實效寬以馭民寬者兆

因循之弊仁爲從政仁者基姑息之原不使法行  
而知恩何以小懲而大戒不厭詳求務期盡力第  
望治亦難太速即更張恐屬徒勞其在於今惟期  
用仁而必用明以防壅蔽之漸歷稽諸古疇非修  
文而兼脩武以輔剛斷之資苟無倦而有恒自先  
難而後獲此皆矢心之告敢曰出位之謀意者臣  
工曠職或纖悉於小吏而鹵莽於公卿兵事寢弛  
亦粉飾乎太平而耻言夫甲冑天地以萬民托陛  
下固不敢不奉天而宣猷祖宗以天下托子孫尤

不敢不承先而展愛信賞罰以辨官才何害朝廷  
之忠厚擇賢良而汰冗吏究爲救弊之要謀在臣  
子感激之過不必顯言非陛下大度之君何以見  
諒思作法於涼尚不能克繩於世世矧拙言於政  
安望其敷訓於元元將恐托之空言終無裨盛治  
敢不贅以數詞條爲三劄仰惟非道不陳於前願  
學孟軻之敬有謀乃順於外竊比君陳之忠伏願  
精明出以渾厚而張弛各有機宜廣大寓於精微  
操縱施於各當庶幾大法小廉以交警而成交泰

遠來近悅有實政而無虛文

擬宋知諫院歐陽修朋黨論表

慶歷二年

孔聞徵鳳崗

運通則泰允諧喜起之歌大道爲公共矢匡勦之  
力况協恭啓治旣遇其時而乾德當陽適符其位  
敢不傾夫肝胆冀有報於涓涯竊聞於野之同必  
先信友有邛之渙切于事君嘗思顯比之風遐想  
明良之日八元八凱惟古帝之能宅賢四裔四凶  
乃聖主之能禁暴蓋末季始立朋黨之名逮漢唐



遂貽國家之害在昔之日以節覽伍文爲前車近世所傳有余靖尹洙爲後轍臣修久居近地萋菲之謗易生夙抱朴忠幸聖明之能見宥維始以勢力相傾乃立門戶之異繼以節義相尚遂分清濁之流以君子而黨君子釁隙易乘至小人而攻小人毒流最遠豈獨人才之消長實關國運之隆污茲蓋伏遇

明爲兩作道用三驅謂其愚而能察知臣或出於無私舍所短而錄長以臣稍習於稽古務除煬竈之奸允廣合宮之聽但恬熙

既久執政者每貸於縉紳及偷隋漸深好名者遂從爲結納用致流風之標榜豈云月旦之定評然廉耻之風不存而彰瘡之權旁落惟天子剛柔並用斯皇極正直無偏故寬必用嚴群邪無狎而欲逞之勢慈以能斷衆正有恃而各安之心乃成解悖之功始致渙群之慶君子亦黨觀過可以知仁小人無朋喻義所以謀利至於夬之不勝若驟膺非分之懼射之而獲恐別生意外之虞此皆自色揚廷之道非獨羸豕躡躅之方從古有之於今宜

慎臣等聊陳緒論俯盡微忱恥黨人之不與亦豪  
杰之過爲其竒乎明至而未能乃賢者之樂處其  
後仰助高深少抒萬一伏望心崇睿鑑法用包荒  
絕請謁之私王猷紹茲允塞杜讒邪之口帝德於  
以光明則苞桑之業永無連茹之嫌葵藿之私不  
致積薪之誚

擬宋召還英州別駕唐介知諫院謝表

嘉祐元年

路振飛

皓月

雷霆雖怒意實主於栽培刑罰雖嚴德獨存乎養

育坐受五年之謫甘如九鼎之飴是故朝廷之寬  
厚俾托命於瘴烟遂使羈旅之微臣復題名於諫  
院感由恩切榮與懼并蓋聞木直由於從繩主聖  
本於臣直都俞吁咈之風遐哉莫覩師詔保諫之  
義邈矣無聞宣室之問不及文帝知賈誼之踈淮  
陽之詔竟虛孝武憤汲黯之戇彼皆出於過激尚  
何望於生還伏念臣介生於艸茅早忝科第少年  
妄議雖於國體有傷晚歲知憂乃始保全無恙但  
碎首刳肝孰問投鼠之忌正言讜論竟忘指樹之

嫌妄意身輕似葉實臣之所以被讒豈希名重之  
山非上亦莫能曲宥乃復俾以善地使得養此散  
才將立伏之馬一斤不復再鳴而高崗之鳳仍棲  
豈無振羽丹心未折望西清之帷幄依然白首重  
歸聞長樂之鼓鐘如故茲蓋伏遇 宅大  
承休考中布象雖在與民更始之際已有人惟求  
舊之思受善若缺察其情出於至誠從諫如流止  
欲身處於無過欲臣體彥博之忠其報怨以德近  
狗中復之請或因過爲功西垣視草復玷清班右

史記言又塵高選敢言見察挂誤總屬風聞孤立  
無援疑似盡同冰釋陽春大造善雖小而不遺天  
地宏恩言雖苦而亦受有道可以危行犯顏毋隱  
聖明無庸忌諱削藁豈忠遭顛沛而不變其忠貞  
值流離而愈堅其筋力先臣而名者罷旣溢乎前  
旌後臣而來者思復待於異日顧良工之才兼收  
洩勃國醫之智願托參苓求無愧而即安非有求  
而必獲伏願皇慈廣運聖渥終孚憂深投杼不信  
三至之言詔復賜環豈待一人之譽

擬盪平羣盜露布

王 鏊

天啟昌期薄示無虞之警神資睿筭旋成不戰之功氛祲廓清華夸寧謐恭惟云云嗣登天位猷奮乾剛掃一時怠玩之風振累世因循之習蠢茲羣盜敢爾逆天安祿山之反相莫逃子壽先知管叔鮮之流言尚賴成王不惑鴟鴞成性莫懷好音犬馬怙恩忽成反噬陛下怒形文武之赫斯恩施乾坤之曠蕩網開一面計出六奇置赤心於腹中推洪恩於望外故旌旗所指反側歸心金鼓纔聞元

惡授首兵車旣勅徒勞六月之師干羽載陳奚俟七旬之格遂使燕齊趙魏四郡之狐兔都無江漢淮沂萬里之波濤咸息此皆德符玄造謀協神人羣策畢收愚罔遺於一得神謨默運道乃出於萬全四門還穆穆之風萬姓覩平平之政臣職居下剝目覩膚功殄螭螂以當轍車築鯨鯢以爲京觀武歌七德遂完保大之名壽祝萬年願進持盈之

戒

祝李中丞生日啓

吳 惠 孟仁

牙燾映紅雲嶺表倚長城之重戟門瞻紫氣海山  
欣壽域之開十四州寔賴維屏望宜秉鉞五百歲  
間生名世辰值懸弧地復近乎蓬壺年定期乎喬  
嶽東華註筭南極呈輝家蔭岱松根蟠仙李千山  
十水慶八閩甘雨之隨車一鶴一琴喜百越陽春  
之有脚出胸中之兵甲威恬海外鯨鯢運掌上之  
經綸恩浹嶺頭艸木魚麗鶴列無諸之壁壘一新  
木讓泉廉甌郡之繭絲皆免凝清香於燕寢述朱  
遜叟之遺書燃官燭於衙齋擬蔡忠惠之翰墨方

建周召保釐之績欣逢申甫嶽降之期泛蘭蕙之  
光風戶歌燕喜酌荔枝之佳酒人頌熾昌仙鯉湖  
頭僚屬雜十洲之客釣龍臺畔麾幢映五嶽之圖  
咸疑開宴於幔亭群仰盍簪於鰲嶺世承緜  
鶴技愧黔驢叨依廣廈之萬間用效華封之三祝  
紫裘腰笛深思曲奏南飛綠臂卷鞵未遂插花起  
舞伏願算永崗陵恩敷溟渤左右旗鼓咸歡化日  
之舒大小琉球皆沐仁風之扇專文武之制府下  
名絳縣之老人正丞凝於廊廟上作黑頭之公輔

顧惟戔戔之具實出懇懇之誠仰冀汪涵曷勝洋望

祝李中丞太夫人壽啟

玉節綏懷嶺越仰恩綸之沛綵衣拜舞閩山傳祝  
嘏之歡配聲名於范韓勲光竹帛秉訓辭於鍾郝  
世仰珩璜惟三遷模楷於慈親故五福焜煌於哲  
嗣官僚胥忭黎庶騰歡恭惟清畏人知孝錫爾類  
誦讀蟹筐之側躬採擷夫白華論思螭陛之間親  
捧持夫紫誥奉板輿而臨南嶠竹笋與竹馬齊迎

膾江魚而進北堂綠萱與綠榕相映精白勵封鯁  
之操訓稟陶家澄清志攬轡之時教承范母賜孝  
經於閭里化流黑齒之邦布內則於閨襜治浹金  
鄰之郡甫隆析父爪牙之績欣逢魯侯燕喜之辰  
森畫戟於庭除魚軒日麗凝清香於燕寢藿弗風  
和衮衣繡裳膝下獻鶴觴之酒建牙吹角堂前和  
鳳笛之聲材愧駑駘情懷烏烏備員條察尚  
遲三釜以承顏肅拜鈴階竊慶五花之耀鬢飲餘  
杭之釀怡冒二天奏弁山之詩起居八座伏願咸

躋仁壽永奉期願隨環珮而趨朝尊一品公孤之  
母侍肩輿而上殿作三宮妃后之師魏公畫錦之  
堂長生孝笋相國平泉之木只集慈鴉顧慚燕語  
之陳莫罄頌揚之願伏祈丙鑒曷任寅恭

丙戌同年請兵科都諫顧公啓

孔貞行 道行

萬邦作憲光瑩紫玉之標四海羅材茂朗青金之  
選幸際鷹揚之會亶深鉅馳之慚肝膽共盟腹心  
是効恭惟老師三吳瓌秀一代巖瞻樹旗幟以壓

詞壇共仰範型於郢匠握樞筦以登省闈永奠磐  
石於周卿鼎望特簡乎帝心藻鑑式昭乎士類點  
筆而風彪武庫秉衡而星麗文昌納垢藏汗不捐  
疵於赤土鞭駘策蹇總受價於黃金遂令控弦躍  
馬之流獲奏貫虱雕蟲之技拔之茅艸聿登行伍  
之間敢曰熊罷竊擬干城之寄自今以往即一髮  
盡出鑪錘勉竭其愚矢終身莫忘啣結維茲小春  
令序欣當萬寶告成穆卜良辰恭陳旨酒迓瑣垣  
之騶從青霄開移節之晴暉來金鷄於龍門紫陌

動飛塵之景色寵分一顧賜逾百朋翼陳弩矢之  
驅蹠埃旌幢之命

送王相國元宵花炮啓

玉燭調元上弼聖躬於三五金甌履泰下回世道  
於熙明當茲正月之期適屆元宵之節列寶炬於  
千門與星球而共燦張銀燈於萬戶同月璧以交  
輝天街弛禁長安有不夜之娛火樹生香潭府有  
先春之樂某也德慚彪外心抱熱中睹鼇山而蚤  
山是思觀走馬而汗馬爲思聊將頃刻之花仰佐

長春之酒惟憐葵赤曷啻蓮榮

與分守嘉湖張兵憲啟

淮海儲精巖廊拔異經綸大展於匡時德望素孚  
於率土某謏陋鞮鞞士也斗山之仰正殷而桑梓  
之念尤切顧漸行役於軍旅未能執葢以周旋乃  
因竿濫之機得遂門廡之願昨荷殊禮益叨隆情  
是台臺忘分以先施在賤子反衷而知媿敬脩東  
帛敢云羔雁之私恪貢筐篚莫報瓊瑤之雅仰希  
莞頓曷任寵輝



接李中丞啓

吳嘉禎

源長

彩節光臨甌越凜嚴霜之色碧幢風颭閩山含春  
日之輝倚柱石於中朝已欽紫閣黃扉之重來旬  
宣於遐服先看建牙吹角之榮八郡咸仰旃幪百  
僚皆思表率星軺載蒞竹馬齊迎白岫家教青蓮  
才調門風高峻車聯龍尾之街人地清華床滿魚  
鬚之笏讀書醴寺慕范文正之生平射策鑿坡擬  
董廣川之剴切螭頭簪筆賦詩沾袍袖之香豸角  
歌冠封事奏燈籠之錦遂以殊恩之注出膺開府

之尊紫標黃綾捧勅書於殿陛綠榕烏柏馳騶從  
於溪山幔亭之翠千層可方風櫛螺水之紋五色  
庶比恩波一瞻驛洛之星共賀隨車之雨 懷  
鉛欲試製錦多慙漢詔濫承未盡觀風之職戟門  
摳謁冀抒向日之誠伏願澤洽雞林勲銘麟閣天  
吳海若齊負努以傾心鑿齒雕題並聞風而額手  
經文緯武咸歌吉甫之憲邦玉燭金甌群仰晉公  
之入相

徵和秋海棠詩啓

許炳光

子文

蓋聞梓澤重經依然天地苑源再問別是山川芳  
艸怨王孫之不歸柔柔思帝女之長往淵明松菊  
仲蔚蓬蒿共托羈人之跡咸傷烈士之心余一生  
落魄萬曲迴腸飲曉露而葉底無聲哭春風而花  
前有淚鴉憐雲鬢惟應折竹爲釵鶴訝霜鬟謾許  
持荷作鏡遽憶垂鞭贈柳遐思避繳啣蘆於是覩  
薜英之易謝見蘭蕙之早敷自秋徂冬從朝及夕  
蕤成庭卉開列海棠獨標楚楚之姿自得僂僂之  
致徘徊顧影窈窕臨粧紅袖月招來却與梨花同

夢清歌鶯謝去不隨柳帶牽情挾藻空華莫入芙  
蓉之麗句吹藜絕照聊抒荆棘之蕪詞伏願錫以  
瑤章賡之雅什倘不以溝中斷楫永棄泥塗或可  
令爨下焦桐重登几席况蓮社近在山中豈芝壇  
遠於天際迴塵情於綺語發妙想於靈心宋艷班  
香譜出鸞箋十樣潘江陸海寫將鳳紙一函則雖  
寒蟲壞戶翳朽壤而抱孤根將見小鳥巢林出幽  
谷而遷喬木借金以鑄少伯買絲欲繡平原謹塵  
記室敢告僅夫

請山椒和尚住雲石菴啓

陸燕喆

鳩峯

椒公大和尚匏庵鉅公之文孫靈巖大師之法嗣  
既振棒於妙高峰上曾飛錫於翠微庵中性似兜  
羅蘊機鋒于惠遠談如玉屑展廣長于辨才仔肩  
三載之叢林雅意一方之退院竊有敝山小塢者  
地居幽僻名異喧囂了然於此開基天童亦曾題  
額翦松結屋庭生蒼蒿之花續竹引泉圃種旗槍  
之葉敢扳龍象一駐鶴雲暫辭名山熾盛之場俯  
就舊日棲游之地東林遺社定多方外之交南海

留衣膺有叅宗之侶三萬六千頃忻杯渡之重來  
九寺十三庵羨刹竿之復起風帆伊邇緇白同瞻

送葛震甫之金陵九日集虎峰詩序

嚴允弘 任夫

震甫葛子丰神瀟灑德性通明含實吐華風雲變  
態於胸次抽黃對白月露散彩於毫端沉酣闕里  
之書克與偃商齊軌高抱隆中之膝亦將管樂自  
方身被錦囊欲遙辭乎故國腰橫寶劍爰有事於  
都門序屆三秋白帝于焉司令時維九日黃花白

爾含香方增宋玉之悲復動楊朱之泣芝蘭至誼  
安能臨岐路而不徘徊金石雅盟烏得覩征車而  
不悒鬱於是欽邀同志圖話離衷陟虎嶺之巔唱  
驢駒之曲氣清天朗普照以謝乎朱明澹抹素粧  
容光適符乎王女碧水與丹蓉相映慨華滋之易  
零白雲與黃葉俱飛感聚散之靡定靡蕪滿逕特  
增南浦之傷竹葉盈樽豈繼龍山之勝殿前鴛鴦  
遠望而觸目依稀臺上鳳凰遙瞻而疑眸恍惚情  
難判袂淚忽沾裳雖賦出梁才難寫幽心之曲盡

而酒行金谷自憐別意之獨醒諸君感時序而興  
歌清音潛飛千里愴行期而琢句雅思俱深九淵  
璀璨隋珠自爾須臾之盈楮陸離卞璧俄而頃刻  
之成篇不佞學歎五庚敏非七步錚錚瓦缶亦同  
奏響於洪鐘點點螢輝強欲齊明於膏燭極知不  
揣用是爲慙乃爲歌曰閨風輕拂芰荷裳執袂同  
躋百尺岡侑飲樽中雲弄影祖行籬畔菊舒黃緣  
知震澤龍思現俄報金臺鳳遠翔此去天台賦都

下都人擲地聽琳琅

震甫諱龍台山其別號故詩  
中有龍思現天台賦之句

江南春序

陸燕喆

鳩峰

江南春者韻始雲林圖成待詔流連光景吟風弔  
月之辭激宕音散莢葉竹枝之唱一時文壇學士  
金谷王孫爭覩雙環希工合璧尋幽歷險思每鬱  
于青霞逗巧矜侈調不窮于白雪鳳臺躡武獨尊  
崔灝之詩石鼎鏤奇頻發彌明之句羊裙潑墨書  
法本乎七家薛紙凝光彩素兼乎十色神物不毀  
好事流傳得以佳人展同良友若夫海田朝市依  
舊江南烏兔輓轡俄然春至隄邊楊柳塵生芳草

香車墻內秋千釵墮莢蒼寶鬘珠簾畫棟誰家燕  
子之樓藻井銀床是處鶯啼之樹酒餘衫袖相逢  
道上吳儂詩滿池臺我愛荊州山簡裘徊既往寄  
託微哦舊夢難成新愁繼起銅僊漢苑惟栖子夜  
之烏玉樹隋宮空照雷塘之月短簫橫笛不殊三  
弄漁陽檀板金樽何異一轂何滿慨當以慷情見  
乎詞

梅屏詩跋

葉方標 蒼舒

粵自芙蓉濯秀錦官名城桂樹飄香廣寒作殿菊

開苑逕處士編籬桃入秦都漁郎迷洞至如梅者  
不過繞屋堪栽三十幾灣盡見扶疎要未有以之  
栽枝作障屈幹為屏如斯之異者也有之自予大  
父君郁氏始大父甘志抱甕息影灌園以至鳥鳴  
有書蔬菜為圃畫皆成史茶亦名經于是匠心特  
創匪彝所思雲母玲瓏恍入羅浮之境水晶詰曲  
能迷庾嶺之春啄玉丁丁利借吳剛之斧雕香片  
片勾留壽殿之粧不必拓三都兩都之規而已擅  
五步十步之勝方以石家之步障遜此天工比以

王氏之輞川無茲人巧矣諸君子乃錫以名章  
賜來佳什金聲擲地無非編目聯珠玉唾自天盡是  
屑雲霏霧咏隻字而神遊閬苑競險韻而奏叶笙  
簧呂徽之萬山殘雪魚在網而酒亦沽來孟浩然  
六出疲驢花在林而詩將吟就誰云尚白都付殺  
青獨愧予杼詞蕪陋揮筆荒唐豈有鼓號天公足  
為花神解穢匪曰詔頒春史速教昨夜吹開則別  
開斯屏之生面錫是花以佳名者不于諸君子之  
歌咏有深望哉

純陽閣疏

吳鼎芳

疑甫

道豈常道故又玄之玄心非其心乃無象之象純  
 陽教主呂祖先師者三教同波一虛應物半生得  
 意勾中來黃糧未熟三度無緣樓上去玉珮空留  
 海變塵飛何處更論甲子棋殘月曉箇中別有乾  
 坤心心引導出苦海不假移時在在慈悲點迷途  
 只消片偈弟子葉萬里寢室聞香朝露得再生之  
 母祥雲觀彩真丹錫浩劫之恩勾材建閣祈眾信  
 之良因持鉢募緣發自家之弘誓會見飈輪于三

島黃綠羽蓋千五城丹正碧嶂天風吹下步虛教  
 白石青松野鶴喚回塵世夢錙銖隨破慳心名姓  
 同登仙籍石火光中早闢長生之路隙駒影裏便  
 尋無極之鄉

山鵲上梁文

并序

許

彰東耕

鵲善為巢巢中有梁其上梁也必擇吉日良辰  
 蓋鳥中之特異者也癸亥之春予讀書清香書  
 舍庭前老桂有雙鵲來巢朝夕拮据彌月告成  
 因戲為文以落之

伏以陽鳥知情止茂林而相宇巢居避歲向太乙  
以闢門異燕雀之處堂下民無侮類梧桐之集鳳  
朝陽可依慶溢飛禽歡騰羽族念鵲名稱神女噪  
應行人化石呈祥文成忠孝之印安梁兆瑞俗傳  
貴顯之徵狎學士於玉堂雙飛宣詔渡織女于銀  
漢七夕填橋飢啄芳華渴飲清露羞隨鷄鶩以爭  
食朝遊廣野暮返長林堪與鴻鵠而齊行歲當癸  
亥節屆清明翠柳藏鶯喜值遷喬之候畫堂歸燕  
正屬啣泥之時用借桂林一枝聊作棲身之所爰

效池塘匹鳥求為戢翼之區皇皇捋荼弗憚綢繆  
于未雨喃喃共語不辭拮据以修巢雖無碧瓦朱  
甍而上棟下宇猶是室家制度縱乏綺窓繡闥而  
北戶南牖依然樓閣規模快覩靈禽之巧戲矢繞  
梁之音梁之東日出扶桑射斗紅忙將牖戶辛勤  
葺從今不怕雨和風梁之西青山高聳與天齊雲  
飛桂棟濃陰蓋鬱蔥佳樹穩雙栖梁之南南枝向  
暖最堪攀秋來花發天香滿翩翩鳴噪舞簷前梁  
之北小樓有個潛修客時時相對不相驚飲啄飛



鳴任自得梁之上輝煌星月垂天象涓涓露滴夜  
生寒斗室還同大地廣梁之下空庭落葉蒼苔藉  
桂子風飄亂月明清光滿林香滿舍伏願上梁之  
後瑶草長生琪花不老竹苞松茂既風雨之不驚  
地廣天高更繒綴之莫近鴟鴞逃於絕漠永無取  
子之憂鳴鳩遁入空桑恒免居巢之患瑞靄宵凝  
碧樹恍疑二鶴並栖祥光晝見芳叢欣看三鳳齊  
舉子孫濟濟瓜瓞綿綿

復姓呈詞

張本 斯植

呈爲追復祖姓以明宗祀以全孝道事本祖張惠  
係沈興五嫡孫有勘合戶由文契存証惠因幼孤  
張彥升鞠爲子是姓繫於張遂衍螟蛉之緒初傳  
歷世竟忘烏鳥之情昔陳嬰委質以存孤希文上  
言以改姓心跡雖有不同忠孝本無二致本今已  
叨鄉飲深慚未敘乎彝倫男餘烈濫厠膠庠安可  
得罪於名教國之大事在祀家之立愛惟親附於  
他人非先王賜姓立宗之意忘所自出豈孝子追  
遠報本之心况幸際明時肯效投秦之范叔隱居

樂地那為僭葉之諸梁本祖既長育於張門故累世不改其籍生裔實由於沈氏以大義應歸其宗在張且居末分匪係宗祧之輕重於沈的為長支允關後胤之存亡懇乞仁恩批縣准復庶使繼百年既絕之世全一家已覆之宗實為澤及枯骨有此激切具呈

七十二峰足徵集四六文卷十三

七十二峯足徵集卷十四上

武峯吳定璋友篁菟錄

林屋蔡書升竹坪編訂

蔡羽

羽字九達生具穎資母吳夫人叅政天樂公之女學通經史九達方五歲口授以毛詩文選即記誦不遺十歲學為詩歌詞意警拔如老成人少長邃于易學為文法先秦兩漢其制義矩矱吳王每一篇出人爭傳為程式乃試於有司者閱四十年不

售其生徒多登仕籍嘉靖甲午以歲貢赴選天官  
卿知其名曰此吾少日所聞易蔡生耶薦授南京  
翰林院孔目居三年致仕歸卒於家錢虞山云九  
達早歲為詩微尚纖縵既而滌除靡曼一歸雅馴  
晚更沉着時出奇麗見者謂雖長吉不過則大悔  
恨曰吾詩求出魏晉今乃為李賀耶其高自位置  
不肯屈抑如此自號林屋山人又稱左虛子所著  
有林屋南館二集

采薇三章

采薇南山下忽憶千里人豈無臨岐言一別今幾  
春舊交容易新新交容易親緘書重復啟曲折情  
難陳勿陳逢彼怒人心不逮故願言秉子德千秋  
愛貞素

采薇北山巔遊子日已久不見的顛高終辰抱箕  
筲隴水何年分白石何年朽嗟嗟紅顏子誰與共  
皓首皓首疇昔期人心不可知天地苟無變片言  
至死持

采采中阿薇終日不成束越鄉無的音日暮亂心

曲飢烏啼我傍忽復止渠屋延佇惡晝長夢見惡  
夜促夢見猶平生人言詎可憑去服一何馨受言  
藏新滕

從軍三章

四牡何駢駢小戎花間出良人執弓矢不能顧家  
室楊園葉未黃是君發家日借問幾時歸長條易  
蕭瑟公孫好功名王事何時畢

青羗與白狄春戰常連秋黃雲失紫塞烽火暗隴  
頭一日如三月三月其奈愁鴻雁日南飛明月日

西流清光不可附帛書安可求

自君之出矣心亂首局曲不聞莎鷄殺忽又過秋  
菊織得數行書無由寄板屋十月露王師誰着鐵  
衣宿迢迢玉門關不能送雙目

浣紗女

浣紗復浣紗紗水清見底水中芙蓉花常與妾為  
比妾顏比花丹妾心比水寒風吹沙中浪花落霜  
漫漫羅帶雙鴛鴦結束玉臂單一心為寒衣行坐  
忘艱難

華燈花初生

華燈花初生堂上酒新綠擊刀連環鳴轉柱悲絲  
促芙蓉開夜屏鴛鴦宿空殼携手千里人話言常  
不足

人日

人日春已深草甲未萌動吏舍人跡稀遙鐘遞相  
送炊釜潮溝水汲抱轆轤甕市趨午昏昏樵陟崖  
洞洞陰陽若相逾東風不解凍農舖在春田十室  
嗟九空張燕勿矜豪裸赤云頗衆婦嗟正月霜夫

征怨孫仲青羌為國讐豈適平陳宋炎涼不相謀  
聞之但悲痛陰坑幾百尺前徒斲回鞞稍待朝曦  
和卧聽時禽弄

講讀廳有感

當年開集賢非適典章寄雖資勝國遺亦拔山林  
萃時叨雲臺議或較虎觀異流傳栢梁和奏草玉  
堂記含毫陸賈登待問枚馬至遭逢一時會千載  
良不易新都開天極文昌照幽冀玉館巖故規瑣  
郎寄名位頗念講署槐曾連衆仙歧南北俱神京

今古同勝事毋令仗筆兒  
踰我瀛洲地晨趨歷蒼  
階遺編識中秘不聞金  
閨宣徒懷彤管志

金陵寓樓有懷

三首

今夜天正寒機杼聲不絕  
辛勤錦中字猶訴當年  
別哀鴻附冥漢潛頽泣  
元穴撫物情不平履霜  
心屢折杪歲客不還空  
然衣百結如何箕斗間  
三星轉明滅

皓魄盈中天松桂俱含淒  
江神弄水碧海岸啼天  
鷄絃促黃金屋妾怨白  
玉閨虞卿已失趙甯戚  
猶

戀齊朝驅畏太行夕鞿憂  
盤溪豈為一囊粟與世  
聊滑稽

賦命難努力貧賤非空疎  
朝為梓人櫟夕作周廟  
璵朱顏朗高步黃髮日  
曳裾出處雖由天工拙  
取自予菊松老荒徑鷄犬  
守舊墟莫信關門人臨  
去猶著書

思田園

五首

南方樹藝早嘉蔬當及時  
王官鑿冰罷忽起田園  
思東郊織臺笠西郭編  
茅茨田家不辛苦衣食  
當

待誰曳裾京華塵徒自憫四支三江綠烟起何日  
佇杖藜

園田二三月不盡花枝烟青村對鳴鳩茅屋下寒  
泉蒸茶復刈麥俱及穀雨前盈盈斯螽股采采柔  
桑錢巖居遠朝列雲卧隔市廛邇來多行役裘敝  
不得旋

旅徒何囂囂頻年棄墳墓秋邁望春歸冬盡悲秋  
度三見王官麥長吟白亭樹青青巖上條已蔽巖  
前路悵悵東遊子何時復西顧秋霜落明鏡朱顏

不逮故

卮酒臨高閣日暮多風塵仰見吳門月不見吳門  
人他鄉促新節異俗為相親飛鳥戀故園遊魚知  
舊津悠悠長途子不愧羽與鱗西風觸琴瑟絃急  
多悲辛

青青瓊樹枝歲晚今幾叢轉轉孤生蓬託根霜與  
風元冬畏羈旅行者憂路窮兩情難強言對面味  
不同履此節序改念我桑梓中言旋逮未冰焉可  
候春鴻

秋日山中

蒼山抱江長秋氣日夕清古閣浮空濛猿嘯陰風  
生石房俱玲瓏出入烟霧輕花從潭心發松向琴  
中鳴林開樂遊苑日落白下城有約暮不來眺望  
傷我情

閒居

言征南山阿顧念北山麓南山可采蘭北山有綠  
竹鷓鴣既和鳴佳氣復郁郁斗酒勿愆期美人温  
如玉朝遊夕告歸風光一何促良會難具言與子

坐明燭

顧盼屬曾阿蘭林亦頽頽柔柔方遠揚芳草忽已  
歇驅車問東川川長不能涉冥寂山林路朝市何  
曠絕渺渺四牡塵杳杳鑿輅音音塵難想像日暮  
愁予心

初見蓮葉圓又逢荷芰香花開望美人花落天轉  
長薰葭歛夕暉野亭餘晚芳燭滅青螢流月出白  
羽涼佳期多契濶良會生悽愴屬酒不能飲迴風  
牽素裳



燃燭復陳絲  
玄夜何耿耿  
夜玄曲復長  
座上生悲梗  
轉聽蟋蟀興  
起盼河漢冷  
萬物更代謝  
四運電流景  
素女虛懷春  
烈士嗟滌井  
握手不見知  
勿訝高堂迥

入踐墟井深  
出畏霜露薄  
北風迴璿臺  
衆籟生哀壑  
懍懍寒士幃  
英英雪交落  
耕田不謀富  
卜隣莫相託  
豈慕踰垣高  
恒慮出門錯  
出門一何遲  
冬陰待朝曝

放舟城隅遂遠西山

朝程發東隅  
秋思結西麓  
親密示欸期  
伸望未能速  
微橈泝蘭沚  
肩輿卧林木  
履巖多峭奔  
踰嶺曠平陸  
卑谷興陰霞  
高花散微燠  
連嶠鹿方車  
對戶鳥分竹  
夕即予誠懽  
謀歸生煩惱  
契遠獲真境  
寡愛形不戮

雪後南泛宿潘氏

黃蘆蕭蕭寒  
草短日光白  
有客弄烟綺  
獨掛滄江席  
起披楞伽雪  
忽見茶磨脊  
蓬萊白銀宮  
宛轉在几格  
天華動物表  
霽色澄川陌  
鶴立千年松  
練掛

一片石古厓屏風青冰壺金鯉赤鷄鳴楓樹林馬  
度梅花驛茫茫五湖間未見范蠡宅悲歌對尊酒  
浮生苦行役

贈華子中甫

愛我岩下雲且避秋陽赤潭空天鏡寒風過蕙光  
碧松竹長遮天相逢但掛幘山曛猿欲啼為子掃  
片石

吳東澗品悟道泉

青霞翳沓嶂綠竹迷重關豈知天竅靈千古封潺

湲取供學佛人一飲通聖頑吳公吾舅氏心與泉  
石閒品水得方法勝事傳人間白鹿一朝去妙韻  
不可攀至今蒼巖下屐齒生苔斑松杉揜寒澗唯  
有雲月還阿戎亦佳士吟咏興不慳欲覓舊茶竈  
同子卧東山

秋泉

予愛秋泉清况傍岩花滴魚遊日光中倒見潭上  
壁安得無機人同坐相浣滌白木朝露香紫芝秋  
霞熟石上瓊瑤花采來不盈掬道人閉石門悠然

在深竹

江上晚來山

江上晚來山宛似五湖綠我行霜尚繁已聽鶯出  
谷三歲桃李花天涯一何促非乏篋篋不解秦  
人曲長裾畏風塵握粟厭童僕携手會稽雲扁舟  
未為速

朝陽

夜戶集虫聲朝曦布林影登高伐叢漆乘涼出墟  
井雲端開丹笈松下冪金鼎寒士無相猜熟客不

吾省遐宇流絕輝千巖結晝暝緩頰松綺閒無心  
念朝請

秋日

偃息踰歲時登高感搖落車來不除棘鳥鳴自巢  
閣形迹不見妨漁樵隱相托顧念蓬何生終俾石  
為錯虛心日無怒物至自成樂懸梯覓霞構乘涼  
陟蘭薄宛轉思公子溥溥桂方灼

遊子

欲陳君未喻柰此繞樹烏天涼白日匿霜落黃草

枯哀商座中激急切傾名都呂望未遑周百里長  
處虞草草羈旅間空自懷區區捫蝨上東門未敢  
論賢愚

錢孔周席上話文衡山王履吉金元賓

契濶多憂思歡然集桑梓執手話離別別離何年  
始校書石渠閣反顧若脫屣繫馬親昵門合尊城  
東里欸曲輸素懷次第問髮齒錦瑟未及彈怨歌  
中觴起怨歌何所陳怨此夢寐人出門即天涯恍  
惚難相親

徙幕府同仲先

府邸開平臺松軒轉萋綠四術多朱光閒房靜相  
屬余業倏朝依子懷喜夕篤深居若無人閱暑不  
知酷晚葵數餘霞新蓮摘青玉風清客襟開月來  
琴柱促寂寂方丈間超然出塵俗長令形迹忘奚  
用事溪谷

別甘泉老先生

皎皎萬古月寶景無盈虧不掃青天霾晦盲將待  
誰天人豈二心名教自昔垂我公挺完秀崛起持

網維憫世方惻惻錫類恒熹熹物我本一同同歸  
復何疑戚戚復欣欣春至草木知彼衆嗟已感詆  
毀庸何為蕩蕩光明途反背求捷岐粲粲甫田穀  
顧矜稗利飢甕底醯鷄天嗤笑鵙鸞早天啟誰能  
廢水歸非力追嗟予放失久日暮返顧遲宮墻一  
何高宗廟未易窺南山有墓田跪陳離別辭道駕  
諭南指歲月雲嶠期

寶劍歌

寶劍在匣光不滅銀花皎皎繡成雪有時長鳴思

飲血逾千年兮刃不缺五霸更盟七雄裂功名從  
前不可說媼媚尊前借一刷醉中嗚嗚口堪呖揮  
落動日月殺價傾名都龍額豹尾黃金塗精飛淚  
泣照珊瑚秋霜未落寒影寂神鍔一奮壯士呼抹  
流電瞬離朱星光九點湛明珠左提右挈誰與俱  
騰江湖紫牛斗行逢漢天子千載一驥首銜靈覲  
龍光上賜紫絲綬穿青雲兮入九重頓挫乃在萬  
乘手際遇亮匪易酬恩報主身何有戮鯨鯢兮跨  
八極揮指胡粵妖稜息崇平洛晏野無棘尉陀綏

綏單于折翼萬乘高拱永無慝歸來奏未央功成  
不受職願令四海常晏清清廟丹書勒功德

長門歌

夜何長今日何短月過秋兮恒不滿車麟麟兮西  
復東耿余心兮誰致歎金屋兮餘輝象牀兮故衣  
非朱顏之易凋柰君志兮早遠啟羅幃兮鬱予香  
倘夢寐之來歸彼金石兮能通何迢迢於帝扉

龍江歌

江蓮影落空寒碧江雲掩冉江邊驛對浴沙中鷺

鷺白飛來菱葉蜻蜓赤龍江八月潮正高我看潮  
生坐江石石城官柳猶青青春來秋去何時停酒  
邊山色朝朝綠愁中羌笛難為聽星亂落霜如雪  
明河猶掛黃金闕起來彈劔歌一闋懷佳人兮隔  
洞庭桂子芳兮吾渡浙白雲紅葉相滅明長江秋  
霽連東溟座上偏多離別藪

尊中有明月歌

尊中有明月琴上有素絃美人能彈客能飲玉壺  
正傍花枝邊皓齒對嬋娟清輝相共憐紅顏笑桃

李獨立無比妍月不常圓花易落蛾眉却怕秋霜  
薄良會難湏行樂為君高歌勸君酌酌未終歌轉  
哀金壺銀箭急相催春光今夕爭時刻傾盡車渠  
三百杯

相思行

相逢何日短相別何日長夢見不得親恍惚生淒  
涼香囊舊綰同心結玉匣曾留明月璫明月照繡  
房香囊繫肘後當時長生酒年年同君壽天地本  
無變人心不逮舊秋風吹落瓊瑤花錦衾歲歲遺

天涯寄書日費三青鳥候望虛乘白鼻騮金鋪夜  
夜鳴彩雲朝朝起忽上南山顛還憑北窓几瀟湘  
雖渺茫只隔一江水東園連理木同枯復同綠西  
園比翼鳥同飛復同宿同飛同宿物長情却怪人  
生離別輕黃金不為難口血豈容易鬼神聞子言  
金石知我意為子寤寐求白首勿相棄相思如環  
無盡頭進君萱草暫忘憂恩怨難明得自由

採桑篇

朝採桑夕採桑長安春盡烟草長釵頭網虫結鳳

皇朝來暮去不滿筐不滿筐多縈牽誤折合歡枝  
青青雙可憐踟躕未能去黃鳥鳴枝巔鳥鳴轉悽  
惻玉腕雙無力紅塵綠纈暗天涯舉頭日暮空太  
息本擬春蚕繭成疋縫衣寄與隴頭客綠錢遶樹  
無心採暗滴臙脂浣裙碧浣裙碧臙脂銷愁心欲  
寄路轉遙蒼苔晚來濕羅襪東風暗損羅敷嬌嬌  
易損恨難酬千絲萬纈徒綢繆夫君若識金閨意  
不使佳人空白頭

蛺蝶篇

西園蝶叢叢映花葉十五佳人二八妾鴛鴦帶長  
芳草貼妾面如花步輕捷粉蝶紛紛上眉頰長安  
踏青天氣和千叢萬叢情緒多蹴得遊絲落釵翠  
牽來草露沾衣羅游絲亂草露長美人欲行空斷  
腸綠潭紫礪迴花房銀錢瑣碎雜柘黃飛入桃李  
花落地亦成香花落留臙脂蝶香無斷時相邀入  
羅扇起舞嘖蛾眉蛾眉轉低草轉碧日暮江天欲  
何適梁園應有未歸人章臺豈少思家客思家未  
歸春已殘悠悠蛺蝶空合歡芳草年年成永嘆



郭索篇

江稻初黃五湖白鱸魚作風霜滿天吳淞江頭晚  
潮落郭索公子來翩翩戈矛森森螯足軒背負元  
甲能橫牽吳人啖之不論錢瓊膏玉髓宜烹煎香  
橙作羹葍作羹橫斜錦席相勾連金筐未啟先垂  
涎象箸急啜臍峰堅玉壺相映傾紅蓮山人綠髮  
俱垂肩湖鄉無事茅屋暖今歲仍逢大有年杖頭  
縣得看花錢醉後橫眠桑柘田郭索郭索與爾長  
相結每舉一斗贈爾風騷篇

婬好曲

班姬著搗素漢女無比才容華冠後宮花月還羞  
猜君寵重妾心疑恩中隱怨不可知陽阿一旦進  
美人構嫌造詛生分離舊花落新花開昭陽歌舞  
弦如雷龍顏夜醉晝不回西宮寂寂封青苔莫怨  
團扇影秋風不憐故物總悽涼霜侵玉階樹唯  
有窈窕篇千秋照貞素

蟋蟀篇

露蟬盡抱枝頭枯黃葉已逐秋風去空山夜靜深

閉門何事啾啾達霜曙候蟲變時序更江湖催促  
遊子情戶之樞牀之足愁人不寐起秉燭十月未  
授衣九月未築場歲寒始怪農家忙嘻嘻夏屋爾  
何為欲祭先農無酒漿一粒須辛苦萬鍾戒怠荒  
聽我蟋蟀歌瞿瞿無太康

鞦韆怨

丹楯朱干傍花砌青絲流蘇兩頭繫蒲萄結束相  
思帶玉釵雙挽盤龍髻對對來尋花下繩雙雙去  
作雲間戲難銷寂寂玉樓情可惜青青芳草地玉

樓易斷腸芳草令心亂空上秋千架春愁未曾斷

陰山風高

陰山風高馬毛縮沙場草枯無首葆單于射雪蒙  
縵胡穹廬夜炙熊羆肉樓煩將軍來欸邊雲中萬  
騎俱爭光漢家飛將鋌槊鉅斬得月氏頭血鮮陣  
雲蒼蒼暗紫塞長城殺氣連狼烟朔方孤兒不畏  
死死中求生報天子髑髏如柴身捷輕瀚海北去  
屠龍城歸來不愛黃金印但愛麒麟閣上名

覆舟山臨望

覆舟山頭霽景明長松落落崖石平迴巒秀嶺低  
復昂傳聞此地為臺城南望建章宮佳氣何鬱葱  
秦淮樹中流遙與宮門通城中萬井如碁畫楊柳  
烟中分紫陌內園蘭桂浮溫香戚里池臺蕩朱碧  
鳳凰樓閣無處尋臨春結綺作梵林樽前却是樂  
遊苑市朝更改成古今登臨易頭白啣盃落紅日  
迴望北湖烟蟬鳴樹蕭瑟秋波慘淡荷芰花玉鳧  
錦鷄踏浪霞西曹已鳴馬東署復報衙冥冥壺底  
月寂寂城頭鴉停琴送盡飛鴻影引領天邊不見

家

桑乾河

桑乾八月寒胡中射生早彎弧決封牛群氏醉眠  
草白登山頭熊夜啾胡人火獵無時休并州小兒  
慣廝殺夜半竊得丁零頭左手接飛鳶右手挾雙  
矛馬上吹胡笳揚鞭入朔 嫖姚帳前交首級但  
問幾級能封侯吁嗟死士在邊不用憂

東昌郡光嶽樓

博州城高日未落城中巍巍千尺閣南瞰黃河北

眺燕百川羅絡臨中原風烟頃刻生杯酒登臨令  
我心茫然手中雌雄劍隨行二千里踟躕古今事  
欲舞客不喜秦雲忽然低岱宗參差起平望箕斗  
間好與牽牛語魯連下聊城千秋仰名義高臺尚  
青青未識射書地鄆州節度何不臣銀槍效節空  
危身聖明一統無戰爭綠河輓粟舟鱗鱗城門不  
用玄甲守河邊古戍花萋萋馬馳匝匝嘶入雲烏  
穿簾箔啼向人芙蓉屏開宿翡翠沉香火底薰麒  
麟昇平自古變繁華青樓大道歌殺新臨觴欲飲

天色晚層闌佇立傷吾神

虎山橋

初出山腹中復見水行處透遲得平墟蒼茫急回  
顧山梁不為高延攬自成趣風條薄林翠珍木接  
葉香前葩未及瘁後萼重競芳朝遊屢過生霞石  
夜宿曾投松柏房從來不識銅坑面今日青青落  
吾掌上崦何明媚下崦亦清朗楊花飛飛青錦陂  
苻葉差差木蘭槩前帆滅後榜興長川引領雲憑  
憑游絲起暖氣昏須臾不見西華村東風吹亂鷗

鴻群水西顏色何紛紛繫馬荒祠忘夕曛

花村草堂歌寄李子原承

新河渺渺楓橋浦百花叢中有香土書生卜館面  
西山十里青溪抱東戶青溪抱東戶水鳥群無數  
前朝勝景開華洲今代書教續芳杜南峰高北峰  
俯日日飛雲罨窓廡上沙水下沙水翠波粼粼織  
成組我昔投宿堂背樓前村夜過清明雨千巖發  
彩流朝霞茂苑騰光盪碧宇櫻笋烟籠文藻軒鷓  
鴒岸送樓船鼓飛梁畫檻盤彩虹菡萏湖邊女搖

艣宵長忽遮寒山鐘月昃猶揮石床塵十年不上  
李子堂金陵城邊話江滸徒令風景形夢寐何由  
復作花前舞題詩先寄花村主

贈沈博士春波

涼風颼颼初落木休文乘秋入林屋看月同登蔣  
濟樓採藥遙尋子真谷余家柴門宿荒草竹下開  
窓通白鳥秋眠推枕日高春時撫闌干坐木杪沈  
君過我不厭寒問我著書完未完寫經欲就松間  
露探老猶疑甕底丹君言山高水長重複重應有

竒物生其中文章渾厚得元氣千古不朽必此翁  
多君愛我謬見推顧我不足為君知角皓曾煩漢  
廷詔劉根枉致人間疑坐君且對橋邊酒來日山  
中九月九白雲本是予家物青芝匝地非君有送  
君乘風返不見書畫船但見虹霓貫牛斗

越來溪

越來溪光常浥浥遠接吳江混寒碧暝鐘未起秋  
霞飛坐眺無如茶磨石越來溪上多遊人香車寶  
轡俱生塵桃花妬紅芳草綠三月來尋曲江曲春

花秋月無盡頭朝來暮往何時休吳臺越館今何  
在蒼烟碧石俱含愁我來八月露氣涼常從雲端  
開竹房溪山一卧便十日形骸爾我渾相忘沙明  
鳥白柰不得况是長橋菰米香

姑蘇臺

夜有吳題月朝有出棟雲高臺佇歌舞羅綺何紛  
紛吳月常從越山起越花却種吳宮裡眼前不盡  
西子歡安用窮觀三百里興亡不自由春草生銅  
溝惟有橫山色空帶蛾眉羞香魂想像朝雲廟綠

泥繡斷金燕頭朝雲滅金雁冷夕陽滿地青楓影  
樂遊苑

春河流春草生昔人歌舞今人耕鍾山紫氣日夕  
來金城十里飛華英水近溫泉殿園香貫赤縣樹  
染北湖烟寒碧浮山川瑤池正在鳧雁中阿房閣  
道生青楓尚留一水折田間曲江想像無花紅拾  
得古釵頭田夫不能識豈知石上斑元是鉛華色  
臨春寂寞香霧收景陽月色空生愁金陵王氣無  
消歇丹陽翻作神皇州市朝多改易輦道生荆棘

瞻望青雲中勾陳連太極野雉麥上飛鴛鴦出蒲  
間蓬生狹斜中日暮車不還車不還其奈何西園  
遊子傷心多

清涼臺

清涼寺裡清涼臺交巖互磴青崔嵬揚子江邊白  
鷺洲白雲紅葉長悠悠都門蓮已落蟬聲滿城郭  
躋眺丹霞端乾坤忽開拓霸陵黃屋翔青雲鍾山  
紫氣何紛紛秦淮水接建章宮銅溝亦與寒潮通  
層樓累閣分朱邸主第侯家相對起瓊臺砌斷金

沙路鞦韆亦在青槐裡翡翠常啣蘇合香鴛鴦只  
浴胭脂水繁華轉傷心今古多升沉六代既冥漠  
南唐亦安尋水晶宮殿野棠開千門萬戶生秋陰  
四望何茫然忽建城頭羽帆從采石來烟分歷陽  
樹遙川動霽景碧草滅江渡啣杯不盡江南情與  
君仗劍歌昇平日暮關門一鴈橫

桃花駿

桃花駿馬白玉蹄金羈絡腦無人騎綠駮瀟洒鵝  
臆長金瞳箭耳骨月竒背負柘黃羅牽過麒麟殿

流蘇動連錢高覆奚官面紫光燦燦照林木龍影  
時時驚水族苑中何事獨優閒曾有竒功在簡竹  
騰天門步月窟一日萬里蹄不蹶絕崑崙破突厥  
口啣可汗頭來朝建章闕天王為舉萬年卮清涼  
殿前賜湯秣切方無事邊草青為留龍種間天庭  
十年對仗勞畫工胭脂用盡難圖形世乏九方臯  
老馬不可輕為君歌此駿轉奏明堂和九成無令  
大宛獨擅名

祥公話



山僧荷衲眉滴青蒼藤卓地鉛作殺芒鞋踏遍天  
邊山白雲擔出人間輕自言尋師一百日月蹬霄  
梯盡歷越路窮不聞啼鳥殺側身曾穿虎豹窟天  
目高山何處起脚繞臨安五百里諸天鐘磬虛無  
中秋霞冬雪迷禪宮朝箱忽自淵底來夜燈却在  
空中紅風高六月冰不解胡孫啾啾崖谷晦春無  
桃李秋無菊惟見天花發光彩我思越中多異峰  
擬折天姥青芙蓉錢塘隘海天目聳聞渠一話心  
憧憧他年借得飛龍杖還覓支公食雪松

七十二峰足徵集卷十四下

武峰吳定璋友篁菟錄

林屋蔡書雲墨濤編訂

蔡羽

感事二首

青山亂黃葉把酒對霜空沙鳥飛轉白礪花寒自  
紅索居絃不語引領意無窮忽報宣房役猶驚日

暮鴻

夢見人何近邀尋路轉遐座中花易老江上笛堪

嗟蟲聞真無為蟬鳴忽自譁孤筇今夕醉吟興到  
天涯

宿治平僧房

古寺雲依靜澄渾夕話長露隨花墮鳥竹與月歸  
房懺悔知前誤恬愉喜夢涼哀鐘催棹發卧涉樹  
蒼蒼

人日玄秀樓

一杯聊自愛萬物總欣然獨坐山花笑閒飛沙鳥  
圓短筇雲不碍長笛月無邊無客題詩寄孤吟湖

上天

曉起

竹色衣全綠林光露未晞隴猿催夢曉塞月墮烟  
微別恨琴中語流年客裡歸悠悠花上蝶偏作合  
歡飛

諸友泛舟石湖還次治平

水氣連山靄晨遊夕未窮烟中懸磻暝天畔躡雲  
空新月在潭底百花燃鏡中竹房禪榻隱處愛愛  
山翁

新秋

黍稷方華候梧桐乍落時坐看青草變卧有碧霞  
思螢疾經樓數蟬涼抱露悲清商殺已發石畔理  
朱絲

閶門城樓

吳苑已多樹高臺聞急砧千秋開國意落日一登  
臨南去帆烟亂西來秀色深不須孤角起把酒思  
難禁

春館

青綺門前柳朝朝變鳥音遊車自昏旦霧館雜風  
陰草際天難到霞端澗可尋陽春在古瑟未易寫  
孤襟

月二首

半壁初啣嶠新輪忽滿光兔流寒殿影桂落禁林  
香扇底青娥怨歌中白苧涼思鄉茂陵客為爾久  
停觴

入簾猶寂寂度柳故低低輪滑水欲滴鏡明心不  
迷花開鳳苑北人在玉門西萬里遙相望其如猿

夜啼

虎邱山房

去滌厓端茗無如竹裡人  
妙尋身外境暫浣目中  
塵好樹偏臨水餘花似逗  
春風烟步步足欲別轉  
逡巡

燈夕湯子重席上

美景忘遊晏珠燈多夜光  
春城繡戶月羅靴畫橋  
霜鳴馬客先發誰家懽  
未央吳宮星未落醉裡笛  
殺長

西虹橋

引領烟無際憑虛念自深  
雲回滿川雁秋起一城  
砧颯颯閣侵暮纖纖月上  
林扁舟從此逝把酒不  
堪禁

林職方志道見招

已報烽塵息長懸林壑情  
朝來紅葉動琴傍碧崕  
行秋朗知懷濶人高覺勢  
輕如何安石倦連月若  
籌兵

灣口

鴻來感秋節雲白認吾家山翠深藏閣蘋香好浣  
紗廢興三寸舌今古一籬花吾友如相問西湖路  
不差

春陰

春陰三十日愛爾晚晴宜月閣水南嶠花明潭上  
枝得來魚尚活分付酒行遲山路村村穩何妨倒  
接籬

齊南書懷

鶯啼魯岬柳雁發高平花鼓促城頭日河流天際

霞來乘春漲穩去傍酒旂斜宛似江南景行人正  
憶家

雞犬村頻到關山路總新城春鶯送客溪晚月留  
人倦矣衣成結悠然酒獨親風烟天際濶吟具紫  
綸巾

王中書少溪第觀雪

朔風三十日瓊樹再開花玉塞環天邑金門積素  
華醉駝官舍馬暖戀酒壚霞不盡王猷興狂歌筆  
陣斜

齋宿

驛使催乾鵲齋居廢曉眠霜籠官道月木翠故宮  
烟朱邸聞鷄早銀潢渡馬堅天河光未滅正掛玉  
樓前

公事後禁門

碧靄凝金瓦滄波到玉津蓬萊雲靄隸玄圃石嶙  
峴內祝開香殿天花捧御真豐宮太皇業温樹萬  
年春

毛督經浣亭官舍芍藥

晝靜綠陰匝微風滿院芬紅蘭昨夜雨碧館見朝  
雲春杳鳥多怨暖多花易醺須煩紫絲帳遮護到  
斜曛

寄黃達卿

桂子饒香吹蘭叢被綠津朦朧隔水月想像倚樓  
人葉下石城急花開筆管新捷書連夜發早慰白  
頭親

秋日

楓疏映天遠草蔓護門深砌亦朱華冒簾常綠蘚

侵園香三夜雨雁過一城砧已畏洞庭晚休添楚  
客吟

秋懷

鴻雁書來濶蕙葭路去長空懸秋帳月却慘石城  
霜天遠楓逾紫江深菊故黃綠知彭澤酒不逮向  
平莊

天筆軒成

涉已秋濤濶巢因舊谷深試投竿百尺真見橘千  
林竹晚開荒圃天寬縱野禽青山虛戶牖難了著

經心

防秋三首

小種時傳箭龍沙戍未歸塞雲懸武帳漢月照金  
微猿臂能連射烏群屢冒圍驛書頻獻捷萬乘正  
宵衣  
降王千帳入一夜過平城角斷仇池月弓膠細柳  
營將軍休蹋踣幕府早交兵益澤西邊國齊呼萬  
歲穀

猶聞胡夜獵漸近白龍堆昆莫新開府單于舊築

臺戍樓三月火塞曲萬人哀馬上蒲萄酒遙從葱嶺來

惠山酌泉

煙靄晴猶重空門路費尋蔽虧乘翠木宛轉向雲林世有煎茶法人無飲水心清風激修竹山古得餘音

經主第二首

草入行宮綠花開舊館紅金枝香漸遠玉輦恨無窮礪已無脂到山猶妬黛工叢叢原上蝶留客立

東風

古碧蒼苔斷寒渠碧瓦深燕頭猶掠鏡草纈尚同心有井分宮路無塵接禁林百年恩澤盡惆悵沁園陰

吳子子嘉携酒至

芙蓉綠新圓芳草未全歇園香過玉壺山光下金闕風生檻外蘋杯到天心月話長尼客歸不畏蒼苔滑

贈金子坤



別子蘭蛻花相逢竹生籜閒門風自開虛徑雲常  
鑰已煩揮塵談未悵聽猿酌為掃南山石秋眠看  
泉落

京邸

款款白雲秋睡足萋萋碧草夕空長窻間殘果啣  
鸚鵡花下繁弦切鳳皇送客常憐白門月著書難  
奈茂陵霜丹楓日日催歸思聞道蓴絲早更香

春夜別友人

晚山橫酒馬蹄輕寂寂都門獨聽鶯閣上花枝驚

夢短雨中春草伴愁生江窮吳楚東流壯曲盡巴  
渝雙燭明不是新年無柳折長條留取繫離情

見杏花懷吳下門生

偶拈如意話天涯不道春風到杏花朝雨似迎新  
燕子江村稀見野人家忙中寒食三年客雪後音  
書兩鬢華豈是草玄耽寂寞欲將文字問侯芭

別恨

天涯鴻雁到江樓樓下清江日夜流宮漏侵陵白  
髮曉風花分散玉京秋黃河欲凍公猶渡紅葉無

多客暫留最是朝霞滿明鏡終南不見兩眉修

石城曉行

白鳥依依朝不散蘋花渺渺水何長山頭隱見盧  
龍觀江上空聞朱雀航客發獨憐尊有月秋高其  
柰劔飛霜關門令尹如相識應笑長裾歲歲忙

春日溪上

開門忽報春鴻去夜雨初聞百谷香月影伴人寒  
不厭花枝到酒老難忘靜中蘋藻知魚樂幽處房  
櫳覺晝長正是車塵飛不到但聽漁父答滄浪

上巳寄文子徵仲

楊柳成絲二月殘闔閭城外路漫漫空餘夜月琴  
中語添得年華鏡裡看送客汀洲蘆笋綠倚樓風  
雨杏花寒故人東閣多情思獨咏蘭亭興未闌

邀太原公看牡丹

子真谷口任逢迎無意緣知宰相情江表從來擅  
佳麗海隅猶自樂昇平霏霏岩霧青泥滑款款春  
雲紫旆輕韶舞已陳夔稷暇洛陽原上看花行

大駕北還

鑿輿北渡五雲移親聽鏡歌海上吹黃道香風鳴  
寶鉸翠華秋日到瑤池千官喜得金門詔南國新  
傳赤雁詩六郡良家齊解甲騶虞旗卷犒王師

寄黃督經

吳門送別汀洲雪天上誰乘八月槎太守古來兼  
將略參軍今日重詩家涼風細動楸梧影秋水初  
搖蘋藻花遙想太平閒甲仗亞夫營裡幾聲笳  
客談西帥梁鎮累捷成功喜飲  
雲中紅葉懸梨栗河北黃鷄滿稻田西將已收青

海箭長城不動紫旄烟百年俎豆興周禮九奏簫  
韶樂舜弦白髮喜來提劔舞風吹天漏夜尊前

逢陸諫議浚明

陸子騎驢白門晚垂鞭花下一相逢碧山自得春  
遊趣黃鳥休疑野客蹤枕上海濤經幾宿雲中湯  
谷阻千峰長楊掃地奈欲發明日吟筇何處從

秋日

清秋山色淨簾櫳八月芙蓉滿鏡中醉任隴雲連  
海綠愁禁楓葉接天紅養魚好伴鴟夷子飲水無

如桑苧翁江上美人期不到吹簫獨自向虛空

春日思家

經旬不出畏春泥狼籍風光上苑西江柳初搖客  
未發山花欲落鳥頻啼故鄉頭緒愁中草野寺棲  
遲石上梯暮色蒼然人倚閣秣陵東去白雲低

靜海寺佛閣

夜宿猶依白鷺洲朝遊忽到古城頭江聲不為行  
人竚山色常含往代愁葉下碧欄蕭寺晚馬嘶紅  
苑北門秋風流總是周南客看海啣杯一倚樓

清明日張月鹿至

鷄聲東傍禁城隅官舍青青繫白駒上苑花枝淹  
舊雨御溝楊柳發前湖風光未判春多少弦管難  
明恨有無綠草漸高隄漸沒憑君推牖看鷗鳧

館中冬夜

燈火青青閉草堂茶烟猶自攪爐香寒宵不盡官  
城葉月色偏兼客館霜近闕木魚傳警切高樓銀  
箭滴愁長公車射覆虛遲晚方朔何須粟半囊

春去

萍藻經春高石床水亭終日柳花香坐忘屋裡青  
山近卧起天涯綠草長楚國登樓空作賦梁園啼  
鳥苦思鄉東欄芍藥三年別誰護西湖夜雨狂

冬日寄諸昆

理書烘日映窗紗雁字橫空忽又斜海上碧桃逢  
雪采江南盧橘遍村花湖鄉晚喜銀魚賤霜閣朝  
留紅葉遮臘近家家炊麩米何人騎馬獨天涯

懷舍中牡丹

輕薄東風燕子斜長安有客未還家燒燈不是春

山夜對月虛懷舊館花卧處小屏霞寂寞夢中芳  
草蝶誼譁天涯物候關情極乘興思浮碧海槎

期王子履吉看花不至

春星浮動闔閭城此夜憑闌為友生嘉樹月來香  
氣足草堂風靜玉琴鳴未嫌國色人難品卻怪山  
陰客不行會合難期江海濶年年芳草管閒情

人日山樓

青錦屏風石倒懸石上朝朝生紫烟午時閣暝開  
巖翠正月山深發澗泉梅花半白情未已沙鷗欲

去心茫然晴波渺渺三萬頃何處飛霞來酒邊

早春

清江宛轉映村行笑指群峰看雪晴野籜製冠雲  
水淨山花浸酒烟霞明天涯已動碧草色谷口初  
聞黃鳥散湖北故人相見少晚來空憶闔閭城  
上日風清烟靄收長洲新水綠悠悠春回樹色流  
鶯亂寒入花枝翡翠愁吳地月明人倚棹江村笛  
好晚登樓歸鴻不待天涯暖早折紅梅寄隴頭

東府旅次

有客白馬來高林碧雨歇湖上石樓開忽見山吐  
月

海霞初歛夕江月亦乘潮興來秋夜笛擬度赤城  
標

引奏後即事十首

中使迎軒簇彩旃千官猶在玉河邊香烟未散龍  
輶起今日君王御講筵  
璠樹花間金鳳翹紅鞍綠轡馬頭驕當朝戚里多  
豪貴惟有何郎早插貂

天王不用擊毬坊錡禁清嚴百草香都人更勿憂  
巡幸但聽雲中駕鳳皇  
溫泉花木四時開閣道笙歌霄漢迴萬歲千秋常  
有道內家真樂勝蓬萊  
千門花柳轉楓宸百和香中過輦塵銀箭忽從天  
上落六宮仙子聽時辰

林開鳩鵲綠烟銷月掛珊瑚樹影高閨苑風清仙  
曲妙西王連日進蟠桃

珠簾綠纈紫葳蕤小鳳頭軒花下移長信宮前宣

使急平陽促馬赴瑤池

金華筵罷退從容小仗穿花聽午鐘五色傘中黃

帔羃太官初進紫駝峰

金水荷花接綺軒石渠銀鑰掌中閣西崑學士封

麻晚斜日猶開左闕門

碧鷄朱鷺羽毛鮮小殿芙蓉貼水圓昨夜百花風

信急御溝新藻有紅泉

蒙古信卿畫馬

高繫青絲背綠駮溫泉洗後立從容奚官袖手天

池晚摹得開元舊墨踪

題鷄鳴山房

山浮寒碧水浮花石壁蒼蒼竹樹斜愛爾玉京秋色好白雲頭上看人家

為王大理白谷題谿山圖

隔岸浮雲細細生谿山幽處一人行春鴻去後無消息昨夜桃花錦漲平

陳氏藏書西舍觀水仙

仙風邈邈玉肌圓月魄飄飄翠綬寒舞雪不令飛

燕逐凌波應在宓妃前

黃金為梳翠為旂迥立東欄雪一圍六萼宮中春信早百花頭上玉香微

公餞吳選部置酒神樂觀

酒上丹霞去復回高情不盡再登臺清江正抱玄都觀可柰長楊掃綠苔

春色無多綠草齊故鄉何處白雲低金明門外牽衣晚莫遣楊花襯馬蹄

王維楨大行使至



綠草如烟柳葉長  
勞勞亭外送人忙  
春深不見王  
喬履空聽流鶯過  
苑墻

陸包山述李三塘見推為題畫

披展雲山話雨中  
士龍人品李膺風  
荊州士論虛  
叨忝借筆題詩看  
洗桐

七十二峰足徵集卷十四

武峯吳定璋友篁菟錄

東山張士枋魯望編訂

震澤賦

朱大右

按禹貢震澤底定在揚州之域說者謂太湖也國語太湖韋昭注即五湖也書稱震澤爾雅稱具區周官職方揚州藪曰具區浸曰五湖又似與之不同吳越春秋又名笠澤吳地記云五湖者菱湖游湖莫湖貢

湖胥湖漢貨殖傳吳有五湖三江之利太  
史公自序亦云登姑蘇望五湖愚意震澤  
以其震蕩不定而名具區以其既定而草  
木藪序為義而五湖者又太湖東岸五灣  
渚水之別淑今連屬矣春秋時呼為笠澤  
漢傳吳志指為五湖皆即今之太湖也于  
是推本作震澤賦以為極庶類之繁衍明  
禹德於不忘詞曰

客有鄒陽生號遠遊公子倣儻玫瑰超竒拔偉衣

白雲之翩翩峨危冠之鞞鞞神怳怳以欲逸風飄  
飄而凝佇於是上會稽探禹穴詔遺踪超洞壑輶  
車前驅輜重紛錯王子進之以笙鶴江令贈之以  
芍藥遂乃揚帆錢塘鼓楫中吳將欲窮覽山川壯  
遊江湖造松陵主人而歡然從予主人曰子號歷  
覽亦嘗聞澤藪之大有三萬六千頃者乎生曰未  
也可得聞歟主人曰唯唯夏曰震澤周曰具區下  
屬三江實為五湖右接天目宣嶺出谿之源左通  
松婁中江入海之洳衆流之委群利之儲苕溪出

其南漂水經其西五灣分其瀦垂虹作之隄流甘  
泉之清液隱雪灘於北隈洞庭中起林屋天開渺  
彭蠡吞雲夢駕雷夏軼孟渚杳不知其幾千里之  
為遠疇能計三萬頃而有餘其浸則汪瀼漭汗洶  
湧奔潏瀾漫杳渺動盪淵渟日光皜潔夜氣綢緼  
流飈吹穀細浪生鱗清瀾凝漪浮花成文出雷騰  
虹蒸雨生雲呼吸陰陽吞吐乾坤如潮汐之不測  
或早暮而騰喧飛揚噴薄迅復汨淪千態萬狀不  
可殫論其藪則碧沙曼衍活水縈紆紫萼翠蘅白

蘋青蒲荇芹蒹藻芡菰荻蘆蔓菁杜若江薤蘼蕪  
雞頭芡寔菱角龍須芡荷掩冉蓮藕芳粵衆物居  
之何可勝圖水產則粘蠓旋螺土哺石花鮓鱧鯽  
鯉鰕鱖鱠鮓縮項之鰻頰尾之魴細鱗之鱸紫甲  
之鰕稻蟹盈尺巨龜帝車鼉聲若鼓蚌彩如霞周  
流涵泳其樂無涯羽族則晨鵠莊鷄鵲鸛鳧鷺鷥鷄  
鷓鴣鴉鷓鷯鷓鴣羣鴻來賓陽鳥攸居鴛鴦遠舉  
鷗鷺忘機王睢並鶩屬玉交飛振翮刷羽以遨以  
嬉來如雲集去若煙微至若矗立洪波七二嶙峋

岑嶽參差岡陵屈伸崔巍猶萃陂陁糾紛上拔千  
仞下臨百尋控地軸以磅礴逐水曲而折旋馬跡  
屹立以為鎮群峰拱揖而相先憂浮雲之流景俯  
蛟龍之深淵空谷谿訝以無底磴道蜿蜒而相連  
厥土則塗泥則壤貢賦書刊稻畦麥隴蔬圃藥欄  
桑柘墻下梓杞雲端香騰梅海錦覆馬鞍更饒珍  
異錫貢登盤厥包橘柚置遞金丸桃尊蜜父果重  
文官楊梅以月晒而黑櫻桃以日炙而丹大谷之  
梨金滲豐圻之棗赤癥莫不連枝並秀駢集乎寬

閒且有琳宮梵宇掩映乎其間中有洞庭實產靈  
石玲瓏窈窕縹緲漏透瘠牛竒章之酷愛宋道君之  
賞識維山巔與水涯實不崩而不泐靜如翁趺動  
若蛇逸浮屠倒懸好女對立或青碧而似玉或丹  
黑而疑漆虬龍虎豹之形補天拔地之質為中流  
之砥柱若逆河之碣石斯又天造之神工而出於  
茲水之盪激也考其星紀在牛斗之分稽乎霸業  
交吳越之兵夫椒戰勝兮張我三軍忠佞同舟兮  
事此寡君始魚龍以為戲終麋鹿而成羣且有歸

釣之徒著書之士去國鳴夸泛舟西子亦復渺渺  
滄波茫茫白水主人之辭未終鄒陽生肅乎改容  
喟然而嘆曰甚矣世道愈下而人心不古也吾子  
好學頗識典冊不迷職方之經邦而盛稱斯澤之  
庶殖不思神禹之胼胝而徒嘆英賢於戰國非所  
以極遊覽之宏望而擴夫五性之至德也遐思往  
古擊節太息請即主人所聞而陳予所得嗚呼噫  
嘻浩蕩方割懷襄未平九州混而莫辨百流壅而  
不行支祁倔强於淮甸天吳狻狷於海濱時維茲

水震蕩靡寧淖淖洶洶澹澹轟轟疑撼天而動地  
猶駕雷而鞭霆類不周觸而天柱折若巨鰲躍而  
洲島傾斯震澤之所以錫名也迨夫九載暨南庶  
土交正波神受職川后奉令應龍畫地以效功庚  
辰持戟而制命導吳淞以安流別江海而表境於  
時澤安其所水順其性鳴者自停動者自靜斯震  
澤之所以底定也千載之下美哉禹功昏墊之害  
既遠灌輸之利無窮漁人舟子之出入豪商仕宦  
之經從擊楫撥棹引帆隨風莫不連檣接觸往來

乎其中斯又具區之數以裕萬民惟正之供也方  
今海宇清明朝廷靜謐內宣教化外修貢職農安  
其畊女效其織工習其業商估其值士守遺經民  
食餘力風不揚波水不濫洑方鎮安寧地土墾闢  
開禹之疆廣禹之績是以九州之外咸仰聖育沾  
濡乎仁義涵泳乎道德浹洽恩波沐浴膏澤漸摩  
浸潤流行洋溢天無亢燥之災人樂沃土之造試  
言其故則辟靡湯湯聖化行矣靈沼洋洋聖澤汪  
矣湛恩普被生四民矣溥德長流達要荒矣下視

一隅寧不隘杯水於坳堂矣乎主人於是聳乎樂  
聞憮然自失仰禹功之長存慨餘子其何益相與  
鼓枻乎滄波曾不芥蒂於胸臆迺起為詩歌以頌  
德詩曰

於赫禹功配天比隆生我遺民宅我土中原隰昫  
昫江漢為東萬世永賴禹功是崇  
於皇禹德立我民極手胼足胝救焚拯溺鑿井而  
飲耕田而食靡謝天功焉知帝力  
於昭太上示民以慶眷佑我皇與民立命開禹疆

土繼禹作聖混合四大維民立正  
於穆聖皇維上帝不常顧我有土  
嶽四瀆七澤九岡罔不修其職來  
來享來王受天之祐於萬斯年  
民有子有孫有引勿替以頌斯文

五湖賦

湯沐天邑

粵稽揚州之域有巨浸焉曰五湖  
或稱震澤一云具區釋名爾雅通  
利河渠列於九藪溉於三吳五百  
計周行之里五道合分入之途連  
類等彭蠡之

勝同名知石燕之誣地志載射貴  
洮陽之派水經注長塘上馮之殊  
有震湖三山之異號得笠澤太湖  
湖之總呼爾其源遠流長支岐區  
別平望八尺沙岸相接昔有居人  
今為菱葉鷓鴣夸鼓胥母之濤龍  
舌印莫釐之雪綠錫貢以得名傳  
出游而駐楫梅梁開水面之花金  
鼎網連舟之鐵沉青簡於綠波俯  
東臯之清冽皆環繞而帶圍類星  
羅而碁列加以宿占斗埜氣稟咸  
池河鼓之晶炳若五車之光燦如  
會合陰陽之靈寶苞萌水德之玄  
符注作九

川之隩澤滙為百谷之上都方其發源諸郡而來也於西北則有義興宛陵溧陽建康金沙鐵甕延陵雲陽會於荆溪達彼閩江於東南則有紫溪富春歙州海陽菰城障縣臨水餘杭濱於顧渚合自武康譬建瓴於高屋咸會同而來王其勢則承如仰孟蓄如聚盎激焉而波溢焉而漲泮洞四達浩淼一望從香水之春濤豬玉湖之秋瀆浮大地其若漚撼青天而直上於是歌帝德頌禹功詫靈蹟泳玄工四隩既宅維我司空九疇作範底績攸同

五伯擁川於潛壑天老澄漱於幽宮堯廬章商之馴服庚辰童律之雲從導三江於既入宣百川而俱東及夫神跡告湮人謀永賴勢殺上游脉䟽餘派導往障來開淤通塞廼有五堰之駕若飛虹長橋之縈如翠帶建銀渚之新隄合澱山之清瀨七浦三渚之迂迴白鶴青龍之汪濊無不磬折而珠旋用朝宗乎大海爾乃桂棹蘭橈越船吳榜馬檝凌波鶻艦轉餉舟行鏡中人坐天上夕載月於鶯湖旦乘潮於烏蕩祠步兵而南行弔澹臺而東向



等千里於湏臾破長風之巨浪若夫春日初晴春  
流正清文鱗試子青蕪照人來龍門之太史泛廬  
嶽之匡君循九曲於木瀆辨千頃於烏程任流水  
而方遠值迴風而更停至若消夏之灣闔廬舊跡  
一水伏陰千峰閉日求之人間尤少其匹覩蓮女  
兮貌都聽菱唱兮散疾溯游得止釣之竒競渡有  
採香之役殆夫零露送秋素霜迎節蓼雨過而波  
紅蘋風起而沙白時乃張漁父之六帆擊蘆子之  
一楫發清商於棹歌悵寒潦之幽咽雨工驅溼水

之羊魚網冷茗溪之蝶以及歲云暮矣今屆玄冬  
草荒無色荻老從風楓盡吳江之葉魚藏硯石之  
空酒國指越來之壘雪浪通蛾眉之峯於時幸水  
嬉之既窮惜山行之未遍爰聽泉於晉陵復采茶  
於陽羨月明鄧尉之巔瀑界楞伽之澗望蒸邱而  
四飛得浮玉之半面館娃訪靈巖之宮艤棹陟石  
蘭之巘赤松為吳會之遊黃公峙春申之縣非砥  
柱乎安瀾但作屏而遠見惟是中央宛在列岫分  
名屹然作鎮東西洞庭王舍如屋石牌如屏三峰

格筆五磯聚星飛鳥北落神馬西青雙鳧比翼橫  
雷接陰津里止咸陽之蹕夫椒返樵李之旌向禹  
期而拜玉盼徐侯而叩舫二姑浮苧而遺杼一女  
思夫而援琴以至若漫若衝曰咳曰獨三山歎澤  
尚有人居墮紹長蛇則惟漁宿龜隨猫鼠之羣虎  
入龜鼉之窟殿浮苔葉之錢沙冷桃花之粥二貢  
鬪兮復開兩岫沉而未沒吳市望之雲垂夜半登  
之日出君山通而帝子欲來杜圻留而少伯不復  
加之箭曠浮碧笠葉驚藍連枝之竹合節之干歷

耳瀨頭之坻金庭玉柱之灣別東西而置獄分青  
白以名巒指群峰於天際恍海外之神山山有林  
屋列仙所棲朝煮白石夕飯青泥嶽瀆經存金沙  
跡迷名著地肺天號幽虛每篝燈以問字或齋燕  
而求珠爾則三門正開五岳旁接駭管若雲鍾乳  
齊雪水色燕支鉦聲清越留素書以待人有白鴉  
之迎客曠侶幽行空谷響屨雖在人間已與凡隔  
於是山川所鍾寔維斯人茂材雅行湛道浮英物  
食土而皆壽壤處沃而不淫非黃虞無此淳俗亦

吳越之多俊民乃或山祝包公之壇石紀綺里之  
跡故其居人甘於隱逸水田一區土墻三尺移柏  
成門牽蘿就壁雙松無買隱之錢數椽即休寓之  
室至如石室得玄衣之授龍威尋綠字之藏故其  
居人宜於文章容容離離鬱鬱將將模山範水縵  
采搴芳紀勝和鹿門之什間奇升石礪之堂若乃  
開練瀆作廐里試水犀列蒼兕赤為髦素為羽進  
成風退成雨故其居人輕心重氣百折不凋一言  
而死鬪雞築湖上之城射鶚落蘆中之矢又如貴

主譜還宮之樂金堂傳天上之音故其居人雅好  
新聲引商刻羽迴雪停雲調高淶水韻逸陽菱度  
曲授雙蓮之奏占兵應石鼓之鳴抑或長往遺蠡  
口之書遠宦卜舒州之穴故其居人易於離別萬  
里暫遊十年永隔既淮海兮異域復燕秦兮絕國  
浮家多浪跡之人採藥有忘歸之客至若訪七策  
之奇計仰三遷之遺風故其居人稱為素封珠玉  
隱采於泉下金銀識氣於臺東木奴一洲則等千  
戶魚妾九島而侔萬鍾迺如鈿函留不死之方綠

石修永年之藥故其居人好為黃白渴飲桂漿饑  
食松屑寄跡北堂探幽便闕雞鶩辟張碩之寒狗  
竇沃蔡經之雪趨之逾下一變而巫春祠吳姥冬  
賽王姑共傳芭於山鬼爭會鼓於花奴吳祀多淫  
亶其然乎若夫斷臂引刀負土成墓女子之貞尤  
為可慕迺內德其信芳更婦功之是務鳴蟋蟀而  
不驚聽蜻蛉而未誤綵箋製入貢之紅繡文刺當  
窻之素原夫人物既分清濁表裡人既秀出物亦  
繼起乃見竒石錯落水底鬼蹲無狀雲飛半止夏

沒冬出欲墜還倚微波忽來悄然如語遠移張祐  
之家高峙牛公之里至呼之以為兄苟憑之而可  
几爰有名泉清絕而冷幽人臨之可以戰茗海眼  
軍坑龍山鹿飲黃公傳高士之源白蓮涌天衣之  
井更多鱗族生此大陂春水之鱖秋風之鱸呂氏  
之鮒山經之鯨丁枕丙尾玉鱠金虀貢於雒下進  
於江都報鼓散於白叟問炙法於專諸赤鱓紫鬣  
之屬督郵從事之徒水虞收其魚稅風俗比之園  
蔬至夫叢木不能歷數老幹吟風深林帶雨杏花

移海上之青竹箭擬淇園之圃久傳大樹於將軍  
尚屬枯桐於龍女娑婆走隱葉之蛇纓絡上垂絲  
之鼠客來似秋鳥啼當午以鱸以廬迺斤迺斧林  
棲水宿異獸名禽東雉西兔秋鷗冬鵲鷓寒鴛瘦  
鷗浴鷗沉鴈霜信而屈節鴨人語而呼名至怪者  
飼虎之有廐尤異者豢鹿之有城水月之茗號爲  
第一超東川之鳩坑妙蜀州之蟬翼助當暑之微  
吟生清風於兩腋蓋丁謂之所不知亦陸羽之所  
未識果之佳者柑橘爲奇三寸含黃七碟全朱定

編氓之舊籍有試士之新題蘇子飲酒而贈賦韋  
生待霜而寄詩復有枇杷東南佳味懸若金丸剖  
如晨露數多華林之四株產勝宜都之千樹食者  
每甘之其如飴是宜錫嘉名曰密父加以鳧莖土  
寔馬乳蔓生黃則盧橘紅則林禽百益七絕之異  
雙頭三角之形楊梅有聖僧之號張黎擅太師之  
稱以及鴈頭揚波鴨脚盈路桃李成蹊視爲臧獲  
棗同安邑之朱柰過瓜洲之素莫不人結花籬家  
開果市更有名園竒葩異芳臺侔酸棗館擬沙棠

牡丹似雒芍藥如揚天苴含露華木拒霜九畹緜  
山之宅千株易老之堂叢桂招伊人之隱幽蘭發  
王者之香重以山藪溪毛園松木菌雉尾之萼雞  
脛之筍秋晚之菁春初之苻分早韭而連畦落寒  
匏而長柄採之可羞擷之無盡他如藥物莫知其  
名吳萸越桃白芝黃精兔絲羊韭半夏長春雕胡  
之飯啜鶴之革可以養性可以延齡人生於斯允  
矣樂土遊焉息焉不讓玄圃水所聚而無蛇山雖  
深而無虎神仙為學道之區宋元得避兵之所當

其惠風和暢止水澄清野曠無鶴鳴之警山空無  
犬吠之驚相與登高望遠弔昔悲今感時之念既  
切懷古之情益深詢重華於雷澤知傳聞之未真  
茲帝者之逸事自飄忽而難尋至於寂寂丹宮芒  
芒禹迹駕兩龍以何之徂鶴阜而太息嗟明德之  
既湮亦邈乎其莫悉如其顧吳門而返眺更憂來  
之無涯以泰伯之遺封乃一敗於夫差悲故國之  
為沼歷千載而猶哀指胥山其未遠至今見麋鹿  
之遊於蘇臺於時歎霸業之易銷念高風之可企

廼思乘子皮之舟拜先生之里登毛公之壇汲墨  
君之水東方之杖履可追園公之衣冠甚偉由是  
逍遙於雲樹之間來往乎烟波之境尋雉塘牛穴  
之竒歷馬塢龍潭之勝問芳洲煉藥之人留石鐸  
藏金之徑悟道訪雪竇之禪同穀求石公之應果  
從斯而終老即葛天與無懷降萱枝而未去扣橘  
社而初開塔影遠懸於泗水宮名別著於天台信  
湖山之可適又舍此而安往哉况有茅茨可以容  
膝佳樹為鄰藏書在室東邨之三畝雖蕪西子之

一峯未失揮絃則衆山皆響醜酒則少長咸集樂  
志續長統之辭交錯引淳于之石當斯時也一邱  
一壑吾愛吾廬方對峰而飯石復上嶺而拋壺扶  
杖命太邱之子問耕多安世之奴真形自圖其煙  
雨竒字再見夫靈符於是閒暇有山水之樂歲時  
覺風土之殊矣爾或秋水始波秋林落葉幽人徘徊  
衡門之側竹樹蕭然煙火明滅中出清歌歌凡  
數闋過客聽之縷縷不絕聆其亂曰寒流澹而無  
穀兮可以息居幸人生之無事兮將沒世於樵漁

洞庭兩山賦

王 鏊 守溪

楚之湖曰洞庭吳之山亦曰洞庭其以相  
埒耶將地脉有相通者耶郭景純曰包山  
洞庭巴陵地道潛達旁通是未可知也而  
吾洞庭實兼湖山之勝始山特為幽人韻  
士之所棲靈仙佛子之所宅至國朝名臣  
徹爵往往出焉豈湖山之秀磅礴鬱積至  
是而後泄於人耶東岡子曰山川之秀寔  
生人才人才之出益顯山川顯之維何蓋

莫過於文兩山者秘於古而顯於今其寔  
有待子無用辭子曰然乃為之賦其辭曰  
吳越之墟有巨浸焉三萬六千頃浩浩蕩蕩如滄  
溟澣渤之茫洋中有山焉七十有二眇眇忽忽如  
蓬壺方丈之彷彿日月之所升沉魚龍之所變化  
百川攸歸三州為界所謂吞雲夢八九於胸中曾  
不蒂芥者也客曰試為我賦之夫太始沕穆一氣  
推遷融而為湖結而為山爰有群峰散見疊出於  
波濤之間或現或隱或浮或沈或吐或吞或如人



立或如鳥騫或如龜鼉之曝或如虎豹之蹲忽起  
二峰東西雄據有若巨君彈壓臣庶又若大軍之  
出千乘萬騎旌幢葆蓋繚繞奔赴東山起自莫釐  
或騰或倚若飛雲旋颺不知幾千百折至長圻蜿  
蜒而西逝西山起自縹緲或起或伏若驚鴻翥鳳  
不知幾千萬落至渡渚迴翔而北折試嘗與子登  
高騁望近則重岡複嶺喊呀摩谿縈洲枉渚蜚壇  
緬邈遠則烟蕪渺瀰天水一碧帆影見而忽無飛  
鳥出而復沒靈巖則返照孤稜弁山則輕煙一抹

此亦天下之至奇也若乃長風駕浪歆山欲野足  
使人魂驚而汗駭及其風日晴熙縠紋漣漪又使  
人心曠而神怡至于瑤海上月流光萬頃星河倒  
懸盪漾山影又一奇也遙山霽雪凝華萬疊玉鑑  
冰壺上下相合又一奇也風雨晦明頃刻異候煙  
雲變滅咫尺殊狀雖有至巧莫能為象試嘗與子  
弔古尋幽則有迴巖嘗壑窳窳相通琳宮梵宇暮  
鼓晨鐘壽藤靈藥美箭長松金庭玉柱石函寶書  
靈威丈人之所闕也貝闕珠宮繡縠鳴璫柳毅書

生之所媿也翠峰杜圻范蠡之所止息黃邨角頭  
綺皓之所從逝也而闔廬夫差之跡尤多存者翫  
月之渚消夏之灣牧馬之城圈虎之山練兵之瀆  
射鶚之巒出金鐸於淺灘逸梅梁於驚湍他若毛  
公燒丹之井蔡經煉藥之墩聖姑絕雉之塘雪竇  
降龍之淵其石則岌薛嶙峋瘦漏嵌空牛竒章有  
甲乙之品宋良嶽有永固之封其泉則困淪鬻沸  
甘寒澄碧墨佐君表無礙之名天衣禪留悟道之  
跡斯地也孫尚書欲卜居而不能范文穆思再至

而不果豈如吾人生長茲土依巖架棟占野分圃  
散為邨墟湊為闌闐桑麻交蔭雞犬鳴吠里無郭  
解劇孟之俠市無桑間濮上之音婚姻相通若朱  
陳之族理亂不識若武陵之源佛狸之馬跡不到  
周顥之俗駕自旋星應五車地絕三斑廬橘夏熟  
楊梅日殷園收銀杏家種黃柑梅多庾嶺梨美張  
谷雨前茅茗蟄餘萌竹水族則時裡之白鱠殘之  
銀魴鱸鮒鯿自昔所珍吾且與子摘山之毳掇野  
之茸割湖之鮮釀湖之醲泛白少傅月夜管絃之

舟和天隨子太古滄溟之歌弔吳王之離宮扣隔  
凡之靈窩凌三萬頃之瓊瑤覽七十二之嵯峨其  
亦足樂乎彼岳陽彭蠡非不廣且大也而乏巍峩  
之氣天台武夸非不高且麗也而無浩渺之容蓋  
物不兩大美有獨鍾茲謂人間之福地物外之靈  
峰是固極遊觀之美而未知造化之工且夫天地  
之間東南為下非是湖為之尾閭洩之瀦之則泛  
濫橫溢江左之民其為魚乎懷襄之世湖波震盪  
非是山為之砥柱鎮之繞之則奔激暴嚙湖東之

地其為沼乎唯夫天作之寬以納以容地設之隘  
以襟以帶禹順其流分疏別派三江既入萬世允  
賴而吾後人乃得優游於此蓋至是而後知造化  
之意深神禹之功大諱曰  
吾何歸乎吾將歸乎湖上之青山世與我而相遺  
超獨邁其逾遠海山兜率不可以驟到非茲峰之  
洵美兮吾誰與寄此高塞

馬蹟山賦

陳履儼

丁卯予客於瀨上令君醉古堂主人謂予曰曩者

讀尚書左史知有震澤夫椒久矣今待罪永安去  
震澤一衣帶水又以職守弗克往遊先生於斯其  
勝概可得聞歟予曰謹受教於是抽班管而疏之  
曰維馬跡之托基兮粵開闢於鴻濛雖一卷石之  
多兮寔與天地而始終上弗克與恒嵩比肩兮下  
猶得與林屋爭雄俯視七十二峰之巔兮蟠踞於  
三萬六千頃之中波濤滌其塵蹻兮雲霞冠其巍  
峰巖穴為猿鶴之所巢兮洞壑為蛟鼉之所宮其  
山則官長聳秀於青霄秦履崢嶸於湖隩桃塢春

紅藤灣夏綠龜蛇脫鎖於天庭獅象就擒於山麓  
胥山沸伍相之濤靈鷲慙高僧之足畫山當午以  
融融火石中霄而煜煜錢堆米貯夜開達旦之門  
分水行香午聽陽春之曲已交錢而山色不沽遇  
熨斗而波紋猶蹙夫椒風浪尚開鏖戰軍鼓盟頂  
煙雲若見霸圖遺躅漁磯弄落照於晴波點岫醞  
酒香於茆屋其水則天井瀦一泓之甘澤龍泉掛  
百丈之飛流洗耳流雲之澗濯纓石榻之邱曉渡  
分香於荷蕩晚漁買醉於蓮兜半月泉堪煮茗咸

河岸可垂鉤隱君之清波異味丹井之紫炁常浮  
其古跡則瀉池君留馬跡於西青蘆中人試劍峰  
於盟頂上梁文鐫孫學士之山莊勾漏砂沉葛仙  
翁之遺井避暑宮六月三秋望湖亭天光雲影陸  
希叡題雪塢之梅趙孟頫記南山之景至若樹藝  
則楮柚合抱松柏千尋梧桐棲鳳桑柘降鷲竹擁  
淇園之綠橘垂南國之金聖僧吐火多子連妊蹲  
鴟似甕宗果來禽猴心披赤而累累鴨脚綴寔以  
鱗鱗何先生奏功於田畝李夫人獻味於園林天

喬則既難更僕而悉數果蔬亦不能屈指以敷陳  
若乃春日載陽谷風來只百卉爭妍群芳競韡天  
桃穠李緋白千家麥隴菜畦青黃百里風扶柳絮  
以輕颺月映梨花而若洗參差籬落者玉版禪師  
睨皖枝間者金衣公子遊人醉卧于花陰詩客泛  
舟於春水迨夫長羸秉令炎帝乘軒新篁解籜於  
北牖蘆橘乍熟於西園芳茗出而旗槍戰時雨足  
而桔槔懸啟雙扉而下榻迎好風之泠然寄午夢  
於槐柯忘身世之欲仙暨乎炎夏既徂素商在御

稼被黃雲桂飄玉露湖光浸月以空明山色凝烟  
而欲暮蘆花別渚響奏鳴榔蘋蓼芳洲歌驚宿鷺  
楓葉紫而衆山酡菊花黃而新釀具載觀歲晚霜  
隕蕪葭山容靜而如卧木葉脫而亦嘉後凋者挺  
歲寒之節凌冬者開幽谷之花雪滿羣山如入梁  
王之苑梅開千樹若遊鄧尉之家更有禪宮道館  
輝煌金碧祥符肇造於唐宗水平崇禋於宋室仙  
院燒丹棲雲卓錫妙相莊嚴諸天赫奕高真控鶴  
以遙臨開士浮杯而寄跡梵唄音繞於蓮臺步虛

聲聞於月夕宛遊祇樹之園恍入蓬萊之闕若覽  
夫人文則科名鵲起冠蓋相望文既騰蛟起鳳武  
亦紫電青霜許探花掇魏科於蒞榜薛將軍樹偉  
績於戎行或秉銓衡而著忠清之節或參大政而  
垂藩服之光兩方伯嘉猷有赫三都護我武維揚  
許開府握麟符於趙魏陳中丞建節鉞於荆湘中  
翰振鳳池之羽繡衣除當道之狼或司李於名郡  
或種花於河陽或以陵功而世司天之秩或以文  
教而開鼓篋之堂是皆彪炳於奕代難以計數而

表彰者也敷辭既畢主人曰吾心已醉是鄉矣當  
置之座間日閱一過神遊馬跡之巔而結他日之  
緣



